


من الأدب الساخر

يوسف عوف

فضائح السياسي بيته



منتدی سور الأزبکیه

WWW.BOOKS4ALL.NET

فضائح
السياسة
بيته

من الأدب الساخر

فضائح السياسي ييه

يوسف عوف

نقد المصير بتة اللبنانية

الناشر : دار المحررة اللبنانية

١٦ ش عبد الخالق ثروت - القاهرة

تليفون : ٣٩٢٣٥٢٥ - ٣٩٣٦٧٤٣

فاكس : ٣٩٠٩٦١٨ - برقياً : دار شادو

ص . ب : ٢٠٢٢ - القاهرة

رقم الإيداع : ٩٤ / ٢٧٢٣

الترقيم الدولي : 8 - 127 - 270 - 977

طبع : عربية للطباعة والنشر

العنوان : ٧ - ١٠ شارع السلام - أرض اللواء - المهندسين

تليفون : ٣٠٣١٠٤٣ - ٣٠٣٦٠٩٨

جميع حقوق الطبع والنشر محفوظة

الطبعة الأولى : ١٤١٤ هـ - ١٩٩٤ م

تصميم الغلاف : مصطفى حسين

الرسوم الداخلية : عمرو فهمي

بِسْمِ اللَّهِ الرَّحْمَنِ الرَّحِيمِ

﴿ وَإِذَا أَرَدْنَا أَنْ نُهْلِكَ قَرْيَةً أَمَرْنَا مُتْرَفِيهَا فَفَسَقُوا فِيهَا ﴾

صدق الله العظيم

اهداء....

- إلى كل مرشح لرئاسة قطاع في الدولة . ويرغب في الاطلاع على نماذج من الأفعال والتصرفات التي يمكنه أن يمارسها - دون أدنى مساءلة - في قطاعه أثناء رئاسته له .
- إلى كل معارض لتصفية عزبة القطاع العام ..
- إليهم جميعا أهدي هذا الكتاب .

يوسف عوف

مقدمة

أهم ما يجب أن يتميز به الكاتب المبدع هو قوة الملاحظة والقدرة على الغوص في أعماق الشخصيات التي يقابلها والتقاط ما بداخلها من سمات وأبعاد قد تخفى على الآخرين . . . ثم يخترنها بداخله إلى أن يستدعيها من ذاكرته عندما يكون بصدد خلق شخصية روائية أو درامية ، تحمل في ثناياها بعض هذه الأبعاد ، فيزودها بتلك السمات التي التقطها من أكثر من شخصية .

■ سؤال : لماذا هذه المقدمة الفلسفية الطويلة الرزيلة ؟!

■ جواب : لأنى عندما اكتشفت أنى أفقد القدرات التي أشرت إليها . . وقعت بالصدفة - لحسن حظى - على شخصية واقعية من الحياة ، جاهز بكل المواصفات غير السوية المطلوبة . . فما كان منى إلا أن صورتها تصويراً فوتوغرافياً ، ثم قدمتها للقارىء باعتبارها شخصية خيالية من إبداع العبد لله .

وبالرغم من ذلك فلا يستطيع أحد - علمياً - أن يجزم بأن صفات شخصية السيسى بيه محور هذا الكتاب تنطبق على شخص معين بالذات .

كذلك لا يستطيع أحد أن يرىء هذا الشخص المعين من وجود هذه
الصفات فيه . .

هل فهمت شيئاً؟؟

ولا أنا . . .

لذلك أرجو أن ألفت النظر إلى أن أى تشابه بين شخصية بطلنا
السيسى بيه وأى شخصية أخرى تعيش بينا هو تشابه . . . مقصود !

المؤلف

يوسف عوف

الفضيحة الأولى

مدير
بين العصافير



محمود السيسى : [صائحا] التليفون ده للاتصالات المصلحية بس ..
وانت ظبطوك بتتكلم مكالمه خاصة .. يا ناس خلّوا
عندكو ضمير ..

[ثم يؤشر بالقلم على مذكرة أمامه]

يحول للتحقيق ..

[ينصرف الموظف مطأطء الرأس بينما يرفع محمود السيسى

ساعة التليفون ويحدث السويتش]

محمود السيسى : يا عطيه .. إطلب لى البيت ، ولو المدام موش هناك
تبقى نزلت البوتيك .. ولو مالقيتهاش فى البوتيك ،
اطلبها لى فى محل الحلويات .. السيسى سويت ..



■ السكرتيرات الفاتنات :

■ [يفتح محمود بيه باب مكتبه المؤدى إلى حجرة السكرتارية التى
تشغلها عشر فتيات نقاوة .. وما أن يشاهدنه حتى تأتى كل منهن

بحركة إغراء معينة ، فيففر فاه في شبق ، ويتدلى لسانه فيسقط
لعابه على الكرافة الأنيقة ، فتسرع إحداهن إلى درج الكرافات التي
يحتفظ بها لمثل هذه الظروف ، وتنتقى منها كرافة تقوم بعقدها
بنفسها حول عنقه بعد أن نزعت عنه الأخرى المبتلة وهي تقول له [:

السكرتيرة : كده بقيت ناشف يا بيه !

السيسى : الحمد لله انى كنت مبلول من فوق بس !

السكرتيرة : هى هى . . لا أنا قصدى إنك ناشف مع الموظفين . .
يعنى جامد . . جبار . .

السيسى : [يضحك في بلاهة] هاها هاها . . كلهم بيقولوا على كده . .

■ [كان محمود السيسى هذا موظفا متواضعا خامل الذكر ، به شىء من
البله أو العته المثير للشفقة . . وقد جاء تعيينه في هذا المنصب الكبير
نتيجة لبس غير مقصود . . وقد فوجيء السيسى نفسه بهذه النقلة
الضخمة . . ولكنه سعى جهده ولجأ إلى الوساطات لكيلا يتراجع
المستولون عند اكتشاف الخطأ . . وقد نجح في هذا الشأن . . ولما
كان محمود يعرف ضآلة حجمة وحقيقة قدراته ، فانه - حفاظا على
الكرسى - يلجأ إلى أساليب يعرف تماما مدى تأثيرها على رؤسائه
أولياء نعمته لكي يحتويهم . . وأهم هذه الأساليب الدعاية والهدايا
والجنس الناعم] . .

■ [السيسى يستقبل عزمى بيه رئيسه في مكتبه هاشأ باشأ وهما في انتظار
وصول عميل سيوقع اتفاقا مع المؤسسة .

تدخل السكرتيرات واحدة تلو الأخرى لاستعراض مفاتهن التي يثنى عليها السيبي أمام عزمي [.

السيبي : إيه رأى سيادتك فى وفاء .. عليها جوز عيون .. ولآ شوف البياض ده .. ودى هيفاء غزال ماشى على قدمين .. إنت المرة اللى فاتت عجبتك دعاء ..

■ [يصل فى هذه اللحظة الضيف المنتظر فيرجبان به كما تحيط به عصافير السكرتارية وهن يداعبنه ويضاحكنه إلى أن يتم توقيع العقد فيصبح السيبي مناديا] :

السيبي : فىن المصور بتاع العلاقات .. حد ينده له عشان ياخذ لنا صورة واحنا بنوقع العقد وبكره تنشر فى الصحف ..

■ [يصل المصور ويستعد السيبي والضيف للصورة ، ويتسم السيبي للكاميرا فيفتح فمه فيسقط لعابه على الكرافة الفاخرة .. وتسرع سكرتيرة الكرافات إلى الدرج لتأتى بكرافنة أخرى جافة] .



■ سر الشلوت :

■ [فى المنزل .. ترتعد فرائص محمود وهو جالس أمام زوجته فكرية (بطلة الكاراتيه) وقد كشرت عن أنيابها] ..

فكرية : مين البنيت اللى ردت على فى التليفون لما طلبتلك ؟!
السيبي : دى .. دى .. دى السكرتيرة .

فكرية : هم كام سكرتيرة ؟

السيسى : هى واحده بس .. سناء ..

فكرية : بس موش ده الصوت اللى رد على قبل كده ..

السيسى : لا سناء .. بس أصل عندها برد .

فكرية : وايه حكاية حفلة الشاى اللى حاتعملها المؤسسة وحاششوا

لها حلويات من بره دى ؟ أمال السيسى سويت ده بيع

إيه .. طرشى ؟

السيسى : بيقولوا لازم ممارسة يا فكرية .

فكرية : إسم الله يا ممارسة (ثم تفاجئه بأن تضربه شلونا) خد !

سيسى : (يقفز ممسكا بمؤخرته) آى .. عشان إيه ده ؟

فكرية : ده حايففكر انك ما تعملش زى القرع وتمد لبره ..



■ يا فرعون مين فرعنك :

■ [محمود السيسى يفاجىء مرؤوسه محبى أبو علم رئيس اللجنة بشلوت

في مؤخرته فيصبح أبو علم متألماً] :

أبو علم : آى .. إيه ده ؟

السيسى : ده عشان ما تعملش زى القرع وتمد لبره . . الشراء حا يكون
من محلات السيسى سويت .

أبو علم : ما نقدرش من غير ممارسة .

السيسى : إسم الله يا ممارسة . . والله لا حولك للتحقيق . .

■ [يدخل ابراهيم أبو طبق عضو اللجنة ويسأله السيسى عن رأيه فى
الأمر ، فيصر بدوره على ضرورة إجراء مناقصة ، فيفاجئه السيسى
بضربة شلوت] .

ابراهيم : (صائحاً) آى !

السيسى : والله لاحولك للتحقيق إنت راخر [ثم يصيح مناديا] فىن
المصّور بتاعنا؟؟ . . خلوه ييجى هنا بسرعة عشان يصورنى
وانا باحوهم للتحقيق . .

■ [ويتم شراء الحلويات من محلات السيسى سويت بالسعر الذى
أملته فكرية على محمود السيسى ، وذلك بعد إجراء ممارسة وهمية . .
ويقام حفل الشاى الذى تزينه عصافير جناب المدير وتمتلىء البطون
وتزوغ العيون . . فيزداد التلوث ويتسع ثقب الأوزون] .



■ يتمسكن لحدّ ما يتمكن :

■ [فكرية تطارد محمود السيسى فى الشقة ويدها فردة الشبشب ، بينما



هو يجاورها من حجرة لأخرى ، وهو يجتمى خلف قطع الأثاث من ضرباتها القاسية .. إلى أن يجتبيء أسفل السرير ، ويطمئن إلى موقفه تماماً فيصبح فيها] :

السيسي : اتلمى أحسن لك يا فكرية !

فكرية : وإذا ما اتلميتش ؟!

السيسي : حاولك للتحقيق !

فكرية : وحياة أمك [ثم تقذف فردة الشبشب أسفل السرير فتصبيه في وجهه].

السيسي : [صائحا] آى .. عيني راحت ..

فكرية : اليونيفورم بتاع موظفين وموظفات العلاقات العامة تشتروه من بوتيك السيسي .

السيسي : لا بد من عطاءات ومظاريف ..

فكرية : [تقذفه بفردة الشبشب الأخرى] .

السيسي : [صائحا] آى .. العين الثانية راحت ..

■ [في اليوم التالى يفاجأ العاملون بالقطاع بابراهيم أبو طبق يخرج

مندفعاً من مكتب السيسي ، فيكاد أن يصطدم بأبو علم الذى كان

داخلاه فيسأله] :

أبو علم : فيه إيه ؟

أبو طبق : طلب شبشب الحمام ..

أبو علم : يمكن عاوز يتوضى ..

أبو طبق : لا يا حبيبي ده أصله متعود ان كل اللى بيحصل له فى البيت
بيجى هنا يطبقه بالضبط .. وأنا سمعت إن مراته ضربته
امبارح بالشبشب ..

أبو علم : يا نهار أسود .. خدنى معاك ..

[ويفر أبو علم عائداً]

■ [يرتدى موظفو وموظفات العلاقات وكذلك موظفو الأمن اليونيفورم
الخاص بهم ، وهو من قماش وتفصيل وخياطة محلات بوتيك
السيسى و .. يزداد ثقب الأوزون اتساعاً] .

■ الخروج عن النص :

■ [فكرية تطلب زوجها تليفونيا ذات مرة فترد عليها السكرتيرة دعاء ،
وتحول له المكالمة ، فتسأله فكرية عن هذا الصوت الغريب فيجيبها
بأنها نفس السكرتيرة سناء] ..

فكرية : بس دى صوتها مختلف كمان عن المره اللى فاتت ..

دعاء : آه .. ما هى شالت اللوز بقى ..

■ [فى يوم آخر ترد عليها هيفاء ذات الصوت الأجنس وتسال فكرية
محمود فيؤكد لها أنها نفسها .. سناء] ..

فكرية : موش ممكن .. دى صوتها رجالى تخين ..

سيسى : هو انا ماقلت لكيش .. موش سناء يا عيني عملت عملية
وقلبت راجل ..

■ [يثور الشك في نفس فكرية فتغلق ذات يوم كلاً من البوتيك ومحل
الملابس اللذين تديرهما ، وتنجه سرا إلى مكتب محمود السيسى
الجديد الذى تدخله لأول مرة ، فتفاجأ بطاقم السكرتيرات الفاتنات
فتطلب مقابلة السيسى بيه دون أن تفصح عن شخصيتها ، فيطلبن
منها الانتظار قليلا فتبسط معهن في دردشة مرحة وفي أثناء هذا
تستدرجهن حتى تعلم حقيقة ما يدور في هذا القطاع] ..

■ [يخرج السيسى من مكتبه وبصحبه عزمى بيه وضيف آخر وينادى
السيسى طالبا المصوّر الذى يأتى على عجل يقوم بمهمته فيصبح
السيسى ثانيا] :

السيسى : شوفوا لنا مصوّر كمان ..

دعاء : [تسأله] وعاوزه ليه يا فندم؟؟

السيسى : [وهو يلف يده حول خصرها] عشان يصورنا واحنا بناخد الصورة
دى .. هاها .. هاها .

■ [يلتفت فيرى فكرية لأول مره فيقطع ضحكته] .

[عزمى يقترب من فكرية وقد ظنّها سكرتيرة جديدة ويهمس
للسيسى قائلاً] :

عزمى : جو جديد خالص ..

■ [ويصعق السيبي وهو يعرف عين رئيسه الفارغة] .

عزمى : [هامسا] نوع مختلف عنهم كلهم . . شوف مدملكة ازاي ؟

السيبي : الحقيقة يا فندم . .

عزمى : [مقاطعا] يجرب عقلك . . عثرت عليها فين دى . . دانت فعلا خبير .

[ثم يلتصق بفكره] .

السيبي : لا لا . . ده غلط . . غلط . .

■ [وهنا تتدخل فكرية في الحوار وقد قررت أمرا] .

فكرية : لا ده صح . . صح [تضحك في دلال] هيء هيء هيء . . !

عزمى : [وقد هام اعجابا] الله أكبر . . ده صنف ممتاز أوى .

السيبي : لا . . كله إلا دى يا بيه .

فكرية : الله . . انت حاتحجر على مزاجه . . ما تسبب سعادة البيه ينقى . .

عزمى : أيوه يا بجم . . سبب سعادة البيه ينقى . .

■ [ثم يحيطها بذراعه ويهمس لها]

فاضيه النهاردة ؟

السيبي : [نائرا] فكرية . . حاولك للتحقيق . .

فكرية : طيب تعالى بقى [تطرح السيبي فوق أحد المكاتب وتوسعه ضربا]

عزيمى : إنتى اتجننتى . . والله لاحولك للتحقيق . .

فكرية : تعالى إنت راخر . .

■ [تكومه فوق زوجها وتوسعها ضربا]

[تصرخ السكرتيرات الفاتنات ويهرب الضيف ويحدث هرج ومرج] .

عزيمى : (وهو يلهث) موظفة ازاي دى ؟!

السيبى : (بصعوبة) لا . . دى مراتى !

عزيمى : إيه ؟ . . وليه عملتى كده يا ست انتى ؟

فكرية : أنا أصلى حالفه لاحولكم انتو الاثنين . .

السيبى وعزيمى : [معا] للتحقيق ؟!

فكرية : لا . . للقصر العينى !

■ [ثم تستأنف الفتك بهما] .



المسنود



السبت :

■ [ما أن يدخل السيبي بيه مكتبه صباحاً ، حتى يلحق به مدير العلاقات العامة ويده نسخة من مجلة (نوفمبر) مفتوحة على صفحة معينة تشتمل على نقد للقطاع الذي يرأسه . . وما أن يطلع عليه السيبي حتى يثور بشدة قائلاً] :

السيبي : حضرولى العربية . . أنا حانزل فوراً لرئيس تحرير المجلة دى عشان أعرفه مقامه . . وشرفك لا قفلها . . هم موش عارفين أنا مين وظهري يبقى مين ؟

مدير العلاقات : أنا لو مكانك ما أروحشى يا فندم . .

السيبي : لا . . لازم أروح أواجهه .

مدير العلاقات : طاوعنى بلاش . . سيادتك ناسى يوم لما رحى جريدة (أنباء اليوم) عشان تواجه الاستاذ بَصَلَة رئيس التحرير حصل إيه ؟

السيبي : [يتحسس جسمه ويتذكر] استقبلونى حته دين استقبال

.. [يتراجع] عالعموم أنا زهدت في الاستقبالات الى بالشكل ده .. وأصلى افكرت دلوقتى إن عندى اجتماع مهم هنا .. هات لى رئيس تحرير مجلة نوفمبر دى على التليفون .

■ [يتم الاتصال التليفونى بين السيسى ورئيس تحرير المجلة (ضعيف السمع عند اللزوم) ويدور بينهما الحوار الشعرى التالى] :

السيسى : آلو .. صباح الخير يا استاذ .. انا محمود السيسى .
رئيس التحرير : أهلا أستاذ تيسى .

السيسى : موش تيسى .. سيسى .. أنا محمود ..
رئيس التحرير : بتقول فهمك محدود ؟

السيسى : موش شايف إنكم تجاوزتوا الحدود ..
رئيس التحرير : فعلا .. ربنا موجود .

السيسى : ما تعرفشى إن انا مسنود ؟

رئيس التحرير : وازاى ساكت على روحك ؟ ومن إمتى انت مسدود ؟

السيسى : أنا لازم أرد عليكم .. وعندى بدل الرد ردود ..
رئيس التحرير : تبقى عاوزلك عمود .

■ [يغلق السيسى السكة بسرعة وهو يحدق مصعوقا ، فقد تذكر ما

حدث له من قبل . . ثم يستدير إلى مرؤوسه الواقف أمامه ويسأله:]

السياسي : حد من الموظفين قرا الصفحه دى ؟

مدير العلاقات : لسه واصلين دلوقتى وما حدش فيهم فتح المجلة .

السياسي : اسرق جميع النسخ الى معاهم وانزع منها الصفحه دى
ورجع لهم المجلات تانى من غير ما يحسوا . .

■ [يتم تنفيذ المطلوب ويزداد فضول العاملين بالقطاع لمعرفة محتوى
الصفحة المفقودة] .

■ [يمكن بعضهم من قراءة الصفحة المنزوعة في نسخه سليمة
بالخارج ، فيقوم بتصويرها وتوزيع عشرات الصور منها على
العاملين بالقطاع فينتج بها الكل إلى دورات المياه لقراءتها
خلسة] .

■ [يتم القبض على هذا البعض ويحول للتحقيق بتهمة توزيع
منشورات صادرة عن تنظيم سرى لقلب نظام الحكم في القطاع ،
ونشر مبادئ الشرف والانسانية الهدامة] .



■ اللمبه الحمراء :

الأحد

■ [تدخل الأرملة الشابة فخريه إلى مكتب السياسي فيقفز واقفا ويرحب
بها بشدة] .

السيسى : اتفضلى استريجى [تجلس فيغلق الباب ويضىء اللمبة الحمراء]
تشربنى إيه؟

الأرملة : ولا حاجة .

السيسى : أحسن . . موش عاوزين أى شىء يعطلنا .

الأرملة : يعطلنا عن إيه؟

السيسى : عن . . عن . . عن إجابة طلباتك طبعاً . . أأمرى !

الأرملة : عاوزه اتنقل من القطاع عشان أبقى بعيد عن مكتب المرحوم .

السيسى : ليه؟

الأرملة : لانى كل ما حاشوف مكتب المرحوم أو أمر حتى قدام باب
أودته حانهار ومش حاقدراً أمسك نفسى .

السيسى : حقاً . . [فى تأثر شديد] قطع بيننا الله يرحمه [تهتز كتفاه] .

الأرملة : [تبكى] .

السيسى : بس بس بس (يربت على كتفها) خلى بالك من الاولاد . . ولو
احتجتوا أى حاجة قوليلى على طول . .

الأرملة : موش حانسى أبداً وقفنك جنبنا [تنفجر بالبكاء] .

السيسى : موش كده أمال [يده تنزلق من على كتفها إلى ظهرها] بس بس بس
وأنا حافضل جنبك على طول . . حتى شوفى آدينى جنبك

أهو [يلتصق بها فترتجف] إنتى فى المرحلة دى محتاجة لصديق
مخلص [يتحسس ظهرها] محتاجه حنان .. [يحيطها بذراعه]
محتاجة حب .. [يضمها إليه فجأة] .

الأرملة : إيه ده [بتتعد خائفة] .

السيبى : محتاجة راجل (يبدأ فى خلع الجاكته) ..

الأرملة : [تجرى هاربه وهى تصرخ] الحقونى !!

■ عش الحب

الثلاثاء

■ [تدخل الأرملة الشابة فخريه إلى حجرة السيبى وتواجهه بقوة
وشجاعة] .

السيبى : كنت عارف إنك حاترجعى لى .. حاتروحي منى فىن ؟!

فخريه : سيادتك فهمت غلط .. أنا قدمت فىك شكوى لعزيمى بيه
وزمانه بيحقق فيها دلوقتى .

السيبى : [يخرج لها ورقة من درج مكتبه] هى دى الشكوى بتاعتك ؟!

فخريه : [تشهق] إيه اللى جابها عندك ؟ .

السيبى : اتحولت لى عشان أحقق فيها ..

فخريه : [تحدق مصعوقة] إيه ؟!

السيسى : هاهاها .. انتى أصلك ما تعرفيش أنا وعزى بيه نبقى إيه
لبعض .. وعندى منه كارت بلانش أعمل اللى أنا عاوزه
هنا ..

فخرية : بقى ده معقول يا ناس؟! ازاي تبقى الشكوى فيك وانت اللى
تحققها؟

السيسى : زى ما فيه شكوى فيكى وانتى اللى حاتحققها بنفسك .

فخرية : سيادتك تقصد إيه!؟

السيسى : شايفه المفتاح ده (يخرج من جيبه مفتاحا بسلسله ذهب) بتاع شقة
الهرم .. قصر .. جنة .. حانبحث فيها شكوتك انتى منى
.. والمفتاح ده (يخرج مفتاحا آخر) بتاع شقة وسط البلد ..
عش محندق .. حانبحث فيه شكوتى أنا منك .. وهى
رفضك لى .

فخرية : عيب عليك .. ده المرحوم كان إيدك اليمين واعز
أصدقائك .

السيسى : حايرتاح فى تربته لما أسعد له مراته ..

فخرية : أرجوك .. أنا خلاص اتفقت مع رئيس قطاع المشروعات إنى
انتقل عنده .. ممكن تمضى لى على الطلب ده بالموافقة [تقدم
له الطلب] .

السيسى : ده قرارك النهائى ؟

فخرية : أيوه .

السيسى : وأنا ماقدرش أقف قدام رغبتك .. اتفضلى [يوقع] .

فخرية : [فى فرح] متشكرة جدا .. [ثم تخطف الطلب وتخرج به وهى تتشهد) أشهد أن لا إله إلا الله ..

■ [يضحك السيسى وهو يرفع سماعه التليفون ويطلب رئيس قطاع المشروعات ويقول له] :

السيسى : يا سلام بيه ... مدام فخرية حاتيجى لك بطلب النقل دلوقتى .. ارفضه قول لها إن عندك تكدس فى الموظفين ..

سلام بيه : وأنت متمسك بيها ليه ؟

السيسى : ما اقدرش استغنى عنها .. حالة العمل تحتم وجودها ..

سلام بيه : حيث كده .. يبقى لازم تستنى عندك ..

[سلام يرفض طلب الأرملة الشابة فتعود وهى فى قمة الاحباط إلى

حجرة السيسى ، فيسألها متظاهرا بالدهشة] :

السيسى : إيه اللى حصل ؟

فخرية : سلام بيه رافض ياخدنى عنده .

السيسى : شفتى .. أنا شخصيا عملت اللى على ، ووافقت لك

عالنقل بس هم بقى اللى موش عاوزينك .

فخرية : سيادتك عملت اللى عليك فعلا . .

السيسى : واضح إن القدر مصمم يجمعنا مع بعض . . [يبدأ فى خلع الجاكتة] .

فخرية : تانى [ثم تهرب من الباب صارخة] الحقونى ! . .

[السيسى يطل من الباب وهو يقهقه ويقول لها]

السيسى : موش حاتقدرى تهربى منى . . ولو ما جيتيش حاوقف مرتبك .

[تشعر الأرملة بقله حيلتها فترفع يديها إلى السماء داعية]

فخرية : فوضت الأمر إليك يا رب . .



■ راسبوتين بولاق :

الاربعاء

■ [زينب . . فتاة رقيقه الحال - دبلوم تجارة - تتقدم لوظيفة كاتبة آلة

كاتبة بناء على إعلان نشره القطاع ، وتؤدى الامتحان ثم تدخل

للسيسى بيه شأنها شأن عشرات الفتيات اللاتى تقدمن هذه الوظيفة

بعد أن استبعد منهن المحجبات . .

يرحب بها السيسى وهى تتوسل إليه أن يمنحها هذه الوظيفة نظرا

لحاجتها الشديدة لمرتبها لمساعدة عائلتها بعد أن أصيب والدها بالشلل] .

السيسى : أطمئنى يا بنتى .

زينب : الله يطمئن قلبك يا بيه .. أنا كمان باكتب ماكنة انجليزى وباعرف كومبيوتر وفاكس ..

السيسى : فيه اختبار أهم من دول كلهم لازم الأول تنجحى فيه ..

زينب : تحت أمرك يا بيه .

السيسى : السؤال الأول [يبدأ فى خلع الجاكنة] .

زينب : [تصرخ وتجرى هاربة] الحقونى !

الخميس :

■ [سنيه .. عاملة البوفيه .. ضئيلة الحجم .. شاحبة اللون .. ترتدى جلبابا قدرا .. تدخل مكتب السيسى بيه لتجمع الأكواب والزجاجات الفارغة بعد انصراف زواره .. وما هى إلا لحظة حتى تسمع أصوات سقوط زجاجات وتكسير تأتي من حجرة المكتب يعقبها خروج سنيه مندفعة من الحجرة وهى تصرخ] :

سنيه : الحقونى !

■ [باقى أيام الأسبوع .. يتكرر نفس الشيء مع كل أنثى تدخل المكتب لأى أمر .. فهذه مثلا صحفية جاءت لتأخذ حديثاً من

السيسى . . فتجلس وتخرج ورقة وقلما وتستعد للكتابة وتسأله [:

الصحفية : أحب أعرف من سيادتك نوعية نشاط القطاع . . بتعملوا
إيه بالضبط ؟

السيسى : [وهو يدور حولها] شوفي يا آنسة . . إحنا بنيجي القطاع هنا
عشان نقلع هدومنا . . وإذا فاض عندنا وقت نبقى نشتغل
فيه .

الصحفية : موش فاهمه .

السيسى : حالا حاتفهمى [ثم يبدأ فى خلع الجاكته] .

الصحفية : الحقونى [تهرب] .

■ [كانت زينب فتاة الآلة الكاتبة قد قصّت على شقيقها صادق بطل
الكاراتيه ما كان من أمر رئيس القطاع معها ، فيجز على أسنانه فى
غيظ ، ويعلم أيضا أن نفس الشىء فعله رئيس القطاع مع باقى
الفتيات طالبات الوظيفة فيقرر أمراً] .

■ [يذهب صادق إلى مكتب السيسى وقد وضع باروكة صفراء ، وتنكر
فى زى فتاة يخلب جماها الألباب ويطلب مقابلة رئيس القطاع ،
فيسمح له مدير المكتب بالدخول فوراً فيدخل . يدور السيسى حول
صادق متأملاً جماله وقد تدلى لسانه فى شبق ، ويقترّب منه وهو يربت
على كتفه ثم تنزل يده إلى ظهره ويتحسسوه وهو يصدر فحيحاً
كفحيح الثعابين فيفاجأ بصادق هذا يقول] :



صاڑق : استعنا عالشقا بالله [ثم يبدأ فى خلع ملابسه] .

■ [يسمع مڑبر المكتب أصوات صراخ وضرب تأتي من حجرة السيسى ، يخرج الأخير على أثرها وقد امتلأ وجهه وجسمه بالكدمات ، وتمزقت ملابسه وهو الذى يصرخ هذه المرة قائلاً] :

السيسى : الحقوونى !!

■ عزبة أبوه :

■ [بمرور الوقت يوغل محمود السيسى رئيس القطاع فى فجوره واستثماره لموقعه فى تحقيق مكاسب مادية . . وأهواء شخصية ورغبات حسية . . وتزداد وطأة الظلم على العاملين فى القطاع ، ويستغل صلاحياته فى المنح والمنع والتهديد بقطع الرزق ، فى إخضاع الجميع لنزواته وغزواته . . وهو يسمى كل ذلك جدية وحزم لابد منها لانضباط العمل وزيادة الانتاج . . وهى مقولة حق ولكن يراد بها باطل . . يطفح الكيل بالعاملين بالقطاع وتتردد صيحاتهم بين جنباته قائلين]:

■ : النجاة النجاة . . كيف النجاة . . الخلاص الخلاص ! متى الخلاص ؟!

■ [فإرد البعض قائلاً] :

■ ■ : ما فىش فايدة يا عم . . بقى عاوز تفهمنى إن المسئولين الكبار موش عارفين اللى بيعمله ده كله ؟ .

■ : يعرفوا منين؟ ما هو لازم حد يقول لهم ..

■ ■ : ماتحاولوش .. هو أصله واصل .. ودائما بيقلوها .. إنه واصل
ومسنود .

■ : مسنود من مين؟

■ ■ : حد عارف بقى؟ . أهو مسنود وخلاص ..

■ : فعلا .. ده مسنود .

■ ■ : واضح إنه مسنود .

الكل : [يرددون] مسنود .. مسنود .. مسنود !



نمر من ورق :

■ [يلتقط الصحفى صالح ما يتردد فى القطاع وينقله إلى عزمى بيه

رئيس السيسى ويستفسر منه عن حقيقة الوضع فيفاجأ بعزمى بيه يرد

قائلا] :

عزمى : مافيش حد بيسند حد .. الحاجه الوحيدده اللي بتسند أى

عامل فى موقعه هى شغله وسلوكياته ..

الصحفى : واللى ينحرف؟

عزمى : كل واحد متعلق من عرقوبه ..

■ السبت التالى :

■ [فى الاجتماع الذى يعقده أول أيام الاسبوع فى القاعة الكبرى لجميع العاملين بالقطاع ، وبعد أن يشنف آذانهم ببعض الشتائم والبذاءات والإيحاءات السوقية يتطرق السيسى فى حديثه إلى أن يقول] :

السيسى : أنا عارف إن فيه بعضكم عاوزنى أمشى النهارده قبل بكره . . بس للأسف موش ماشى . . قاعد على قلبكم لحدّ ما بيان لكم صاحب .

■ [فى هذه اللحظة يدخل عزمى بيه وبصحبته الصحفى صالح من أحد الأبواب الجانبية غير مرتين من السيسى ويراهما الحاضرون فتسرى همهمة خفيفة] .

السيسى : ستين مره قلت لكم إنى وضعى مختلف . . عزمى بيه لا يسمح بأن حد يمس لى شعرة أبدا . .
عزمى : [يتطلع فى دهشة] .

السيسى : [مكملا] أنا كنت على طول أخلى عزمى ينسفه نسف . . عزمى ما يتأخرش عنى فى حاجة أبدا . . اللي أقول له عليه يعمله . . خاتم فى صباعى . .

■ [يشهق العاملون ويتجهون بأنظارهم تجاه عزمى لرؤية رد الفعل] .

عزمى : [يبدو عليه التوتر] .

السيسى : مالكم استغربتوا كده ؟ أدينى باعلنها تانى على الملا . . أنا
واصل . . مسنود . . عزمى بيه ساندنى . . بيحب يبسطنى
لإنى كمان بأبسطة . . [العاملون يمدقون مصعوقين] .

عزمى : [يقترّب حثيثاً من خلف ظهر السيسى وقد انقبضت أسارير وجهه فى
غضب]

السيسى : فهمتوا بقى يا عجر ؟ الحاضر يقول للغائب إن السيسى
حايخلّل هنا فى القطاع لأنه مسنود على . .

■ [تحين منه نظرة فيلمح عزمى فيلجم لسانه ويقطع الجملة وقد أصيب
بغصة] .

عزمى : على إيه ؟

السيسى : [ييلع ريقه قبل أن يتدلى اللعاب من فمه كالعادة . . ويكاد أن يقع من
طوله فيستند بيده على الكرسي] .

■ [ثم يرتبك وهو يستند بيده الثانية إذ تفلت من الكرسي ، فيتعثر
ويقع على الأرض بين ضحك وفهقهة العاملين]



الفضيحة الثالثة

كيف تتغلب على العجز؟



السيسى : سيادتك وعدتني قبل كده .

عزيمى بيه : ووعد الحر دين عليه .

السيسى : واعتقد إن أنا أحق واحد بالمنصب ده .

عزيمى بيه : موش لما تقدم لى الميزانية فى آخر السنة المالية وأشوف الارباح .

السيسى : إطمئن يا عزيمى بيه !

■ [ويعود السيسى إلى مكتبه سعيداً مزهواً متشياً بالأمل بعد هذه المقابلة وقد انتفخت أوداجه فيخرج مرأة صغيرة من جيبه ومشطاً صغيراً يمشط به صلغته كمعاده كلما انتفخت منه الأوداج . . عندما يدخل المدير المالى ويصدمه بأخبار مزعجة عن عجز فى الميزانية بسبب العملية الأخيرة التى حققت خسارة سبعمائة وخمسين ألف جنيه] .

السيسى : [نائراً] ومين المجرم اللى تسبب فى الخساره دى ؟ مين الجاهل اللى مسئول عنها ؟ مين المغفل اللى عملها ؟

المدير المالى : سيادتك !

السيسى : [مصعوقا] إخرس . . !

المدير المالى : هى دى الحقيقه يا بيه . . والسبب قراراتك المتهورة اللى بتناقض بعضها . . تحب أفكرك بيها !؟

السيسى : [صائحا] اخرج بره . . بره . . !

[ويخرج المدير المالى مطاطناً الرأس وهو يردد بينه وبين نفسه] :

المدير : هو ديل الكلب عمره ما ينقام !؟ حسبى الله ونعم الوكيل . . حسبى الله ونعم الوكيل . .

■ [ويشخذ السيسى ذهنه بحثا عن وسيلة يخرج بها - كعادته - من مسئولية العجز المذكور كما تخرج الشعرة من العجين ، حتى لا يتأثر قرار ترقبته نائبا لرئيس الهيئة] .



■ [حنفى عزوز رجل أعمال مشهور وصديق لعزيمى بيه رئيس الهيئة ، فيوصى عزيمى بيه محمود السيسى بأن يتعاقد القطاع مع حنفى على صفقة معينة . . فيوافق السيسى على مضمض ، فهو يحقد على حنفى هذا شهرته ، علاوة على حظوته لدى عزيمى بيه . ولكن يتفتق ذهنه عن خطة شريرة يضرب بها عصفورين بحجر . . يذهب حنفى إلى السيسى فى مكتبه بالدور العلوى المطل على البحر ويتفقان على بنود وشروط الصفقة ويسلم السيسى عليه قائلا] :

السيسى : مبروك يا حنفى بيه .

حنفى : [بتلفت باحثا ثم يسأله] أمال فىن المصوراتى الى حايصورنا
واحنا بنمضى العقد ؟ .

السيسى : مالوش لزوم يا سعادة البيه .

حنفى : الله . . ما أنت بتتصور معاهم كلهم . . أشمعنى أنا ؟ !

السيسى : بصراحة . . مافيش مصور . .

حنفى : ليه ؟

السيسى : بسلامته آخر مره خدلى صورة فيها من ظهري قام قفايا بس
هوالى طلع فى الصورة فرفدته . .

حنفى : بالعكس دانت كنت لازم تكافئه . .

السيسى : اكافؤه عشان صورنى من قفايا . . طيب الناس حاتعرفنى
إزاي ؟

حنفى : دى الناس ما بتعرفش إلا قفاك . . أول ما حايشوفوا قفاك فى
الصورة حايشاوروا عليه ويقولوا السيسى أهو . . السيسى
أهو . .

السيسى : [يفتصب ضحكة] . . هاها حلوه يا حنفى بيه . .

حنفى : هات العقد بقى عشان نمضيه قبل ما أسافر أوروبا . .

السيسى : وهو فيه بيننا وبين بعض عقود يا فندم ؟ وعالعموم العقد

موش جاهز لسه .. إمضيه لما ترجع بالسلامة ..

حنفى : لاحظ إن أنا رايح أتفق وأربط كلام هناك بخصوص الصفقة
دى ..

السيبى : ربنا معاك يا سعادة البيه ..

حنفى : وحاحتاج فترة طويلة لحدّ ما أرجع واسلمكم السلعة ..

السيبى : خد وقتك .. شهرين تلاثة .. أربعة .. زى ما تحب
سعادتك ..

حنفى : أنا محتاج فعلا أربع تشهر ..

السيبى : وهو كذلك يا بيه ..

حنفى : نكتب ورقه بقى بالميعاد اللي اتفقنا عليه ده ؟

السيبى : عيب .. أنا كلمتى واحده يا حنفى بيه .

■ [بمجرد سفر حنفى عزوز إلى أوروبا يسرع السيبى إلى عزمى بيه

ويقول له] :

السيبى : حنفى بيه وعد إنه حاييجى بعد خمستاشر يوم ويسلمنا

السلعة أول ما يوصل .

عزمى : ووقع على الموعد ده ؟

السيبي : لا .. اتحايلت عليه عشان يمضى العقد قبل ما يسافر
فرفض ..

عزمى : ليه؟

السيبي : عشان بقى فى سيادتك .. قال لى هو فيه بيننا وبين بعض
عقود برضه؟

عزمى : وانت ازاي توافقه على حاجة زى كده؟

السيبي : الحقيقة أنا كنت واقع فى حرج كبير بسبب صلته الحميمة
بسيادتك يا فندم .

عزمى : الشغل شىء والصدقة شىء تانى ..

السيبي : تمام يا بيه .. واللى أنا خايف منه دلوقتى إنه يتأخر فى
التسليم عن الموعد اللى قال عليه .. لإن ده معناه خساره
للقطاع أكثر من سبعمية وخمسين ألف جنيه ..

عزمى : [مذهولاً] إيه !!

■ [ويحل الموعد .. وبالطبع لا يصل حنفى ولا البضاعة ، وهكذا يجد
السيبي الشاعرة التى يعلق عليها العجز المذكور فى الميزانية ، علاوة
على الإسفين الذى دقه فى علاقة عزمى بحنفى] .

■ [ثم يطلق السيبي صبياناه فى الصحف لمهاجمة حنفى عزوز
الذى تسبب فى تلك الخسارة الفادحة ، وتستعدى الصحف القراء

ضده ويقرر عزمى بيه حظر التعامل مع حنفى هذا نهائيا [.



■ [يعود حنفى إلى مصر فيفاجأ بهذه الحملة الشعواء . . فيستغرب الأمر ويتجه من فوره إلى السيسى الذى يحدته من طرف أنفه ، فيذهل حنفى للتطور الذى حدث . . بينما يتشاغل عنه السيسى بالنظر من النافذة للفرجة على المراكب وهى تتهادى فوق سطح النيل . . وتتفخ أوداجه فيسرع باخراج المرأة الصغيرة من جيبه ليشاهد فيها أوداجه أثناء انتفاخها . . يعقبها بالطبع المشط الصغير عديم الأسنان لزوم تمشيط وتنشيط الصلعة ، ثم ينظر إلى حنفى فى تعالٍ قائلاً] :

السيسى : دانا محمود السيسى يا . . حنفى .

حنفى : ما أنت لو ماعملتش كده ماتبقاش السيسى . . لكن ليه ؟
ليه ؟

السيسى : أنا عندى ضمير .

حنفى : بس يظهر بتسيبه فى البيت قبل ما تنزل . . إحنا موش اتفقنا
على أربع شهر ؟

السيسى : إثبت . .

حنفى : ما أنت مارضيتش تكتب عقد . .

السيسى : إثبت . .

حنفى : دانت قلت لى عيب . . أنا كلمتى واحدة . .

السيسى : طبعا كلمتى واحدة وما بتتغيرش أبدا . . وهى إنى ماليش
كلمه . . هاها . .

حنفى : [يخرج وهو يردد] :

حسبى الله ونعم الوكيل . . حسبى الله ونعم الوكيل .



■ [يحاول حنفى عزوز أن يقابل صديقه عزمى بيه ليشرح له موقفه
ويطلعه على حقيقة ما حدث ولكن آذان وعيون السيسى المزروعة
داخل مكتب عزمى تحول دون إتمام تلك المقابلة . . القدر يدبر لقاء
مصادفة بعيداً عن الهيئة يجمع بين حنفى والمدير المالى وعزمى بيه
الذى يقف على كل ما جرى وعلى العجز المالى ومحاولات تغطيته . .
الخ . فيعتذر لحنفى عزوز عن سوء الفهم الذى حدث . . وفى اليوم
التالى . . ما أن يصل إلى مكتبه حتى يرسل فى استدعاء السيسى
بيه . . فىأتى هذا مهرولاً وهو يفرك كفيه فى لهفة وفرح متوقعا قرار
ترقيته . . ويفتح فمه لبيتسم فيتساقط لعابه فيسرع بإخراج المرآه من
جيبه وينظر فيها حتى لا يفوته منظر لعابه وهو يتساقط ثم يقول] :

السيسى : سيادتك أكيد باعت لى عشان تبشرنى . . . سيادتك وعدت
. . ووعد الحر دين عليه . .

عزمى : طبعا دين عليه . . لكن يسدده بقى أو ما يسددش . . على
كيفه . . أمال يبقى حر إزاي ؟



السيبي : الله .. يعنى سيادتك ما أصدرتش القرار ؟

عزمى : لا أصدرت قرار .. بس باحالتك للتحقيق ..

■ [السيبي يفتح فمه فى ذهول ثم يستعطف عزمى بيه باكيا] .

السيبي : مظلوم والله يا بيه .. دى نميمه [يردد] .. حسبى الله ونعم

الوكيل .. حسبى الله ونعم الوكيل .

الفضيحة الرابعة

السياسي بيه
وفتاة النينجا



■ بسبب الغيظ والقهر النفسى واليأس من الاصلاح يقع العاملون فى القطاع صرعى المرض واحداً بعد الآخر . . إذ يصابون جميعاً بأمراض خطيرة مثل : قُرحة - ضغط - انهيار عصبى - جلطة - شلل نصفى - انفجار فى المخ . . الخ . . فيموت منهم من يموت ويجيا الباقون حياة أفضل منها الموت . .

■ [يخرج أحد العاملين بالقطاع من حجرة الإدارة الطبية بعد أن كشف عليه الطبيب وهو يهلل فى فرح صائحا هيهه ! . . فيسأله زميل مشلول] :

■ : هيه . . الدكتور قال لك ايه ؟

■ ■ : الحمد لله . . جت لى ذبحة صدرية بس . . !

■ : [فى غلّ وحسد] مكتوبة لك يا سيدى . .



■ الزمن الردىء :

■ [يخرج هذه الأمراض من القطاع إلى الشارع ، فتصدر وزارة الصحة

بياناً تحذر فيه من وباء جديد يستشري بين المواطنين بسبب فيروس خطير أمكن عزله ورصده ، وهو من فصيلة السيبي . . وقد ساعد على انتشاره وجود ثقب كبير في طبقة الشرف والأخلاق ، مما لوث البيئة تماماً وجعل المناخ مناسباً لظهور هذا الفيروس ، الذى ينمو ويترعج عادة في الزمن الردى . . وزارة الصحة تحذر من خطورة هذا الفيروس على التركيبة الأخلاقية الموروثة للمصريين . . وتنصح بمقاومته بمركبات السيبي زفتات وهى على هيئة كبسولات ، أو حقن أو اقراص تحت الاسم التجارى سيبي زفتين] .

■ [يتهافت العاملون في القطاع على هذه الاقراص حتى ينفذ المخزون منها ويطلبون المزيد منها فترسل لهم الإدارة الطبية كمية أخرى على هيئة تحاميل (لبوس) زفتاسيبيين فيرفض الكل استعماله وهم يقولون . . اللى فينا مكفيننا هو السيبي ده وانا وقدامنا وفوقنا وتحتينا ؟ !]

■ [يجأر العاملون بالقطاع والمتعاملون معه بالشكوى التى يتوجهون بها إلى عزمى بيه فيستدعى بدوره السيبي ويطلبه بالرد على هذه الشكاوى التى يتزايد عددها . . فيقول له السيبي] :

السيبي : يا بيه دول ناس متسيبين . . ناس مايجوش غير بالسك على دماغهم . . ريح نفسك أنت وسيبنى عليهم وأنا حاربيهم . .

■ [ويعطيه عزمى بيه فرصة أخرى] .



■ الطريق الى بولين :

■ [يطلب السيبي تعيين مترجمة عربي فرنسي . . فيعلن القطاع عن مسابقة تتقدم لها آلاف الفتيات من الكليات والمعاهد . . وتشكل لجنة لاختيار المتسابقات برئاسة الأستاذ أحمد موفق المدير العام بالقطاع] .

■ [في اليوم الأول للاختيار تنعقد اللجنة ويستعد أعضاؤها لاستقبال المتسابقات اللاتي تجتمعن بأعداد ضخمة في القاعة الكبرى حين يدخل السيبي بيه على اللجنة ، وقد تعلقت بذراعه حسناء فارهة الطول ملفوفة القوام ويقدمها لهم بقوله] :

السيبي : المترجمة المطلوبة .

■ [يصعق أعضاء اللجنة و يسرع كل منهم بتناول كبسولة السيبي زفتون قبل أن ينفجر من الداخل ، وينبرى أحمد موفق رئيس اللجنة يسأله] :

أحمد موفق : من غير امتحان؟!!

السيبي : أنا امتحنتها ونجحت [ثم يميل عليها باسمها] موش كده؟

■ [تهز الحسناء رأسها وتنطلق ضاحكة]

أحمد موفق : إذا كانت اتعينت خلاص يبقى مافيش لزوم نمتحن الآلاف اللى منتظرين بره دول .



السيسى : الله .. ده شىء وده شىء .. امتحنوهم برضه ومكافآت اللجنة والبدلات اليومية حاتتصرف لكم زى ما هى .. وعلى مهلكم .. إن شالله تقعدوا تمتحنوهم سنة . حقكم محفوظ ..

أحمد توفيق : طيب على الأقل نعمل لها امتحان سريع كده عشان نثبتته فى المحضر نقوم نسد الخانة ويبقى كل شىء ماشى قانونى .

السيسى : مافيش مانع .. اكتب اسمها عندك .. بولين أبو طرية .

أحمد موفق : طرية؟؟ لقب ده ولا صفة؟

السيسى : الاثنين [ينفجر ضاحكا] .

أحمد موفق : مصرية طبعاً ..

السيسى : لا .. دى من النينجا !

أحمد موفق : إيه !!!

■ [والنينجا دولة آسيويه صغيرة تشتهر فتياتها بالجمال والدلال والشعور الطويلة والقوام السمهرى .. وبحكم كونها مستعمرة فرنسية سابقة وعضوة فى مجموعة الفرنكوفون حالياً فان مواطنيها يجيدون الفرنسية ويتحدثونها بطلاقة] .

■ [ويبدأ اختبار اللغة العربية فيطلب السيسى كتاباً لتقرأ بولين منه

فيأتى به أحمد موفق وتبدأ القراءة ، وإذا بلغتها ركيكة مكسرة فيسترد
موفق الكتاب منها بسرعة ويعلن أنها لا تصلح . . فيثور السيسى
قائلا] :

السيسى : [ثائرا] موش انت اللى تقرر ده . .

أحمد موفق : يا فندم دى مابتعرفش عربى خالص . . موش ممكن تكون
بتترجم من عربى لفرنساوى .

السيسى : ولو . . لكن شاطره فى الترجمة من انجليزى لفرنساوى .

أحمد موفق : بس احنا عاوزينها تترجم عربى . .

السيسى : هى شغلانه يا اخى . . نجيب لها مترجم . .

أحمد موفق : مترجم يعمل إيه ؟

السيسى : يترجم لها من عربى لانجليزى وبعدين هى تترجم من
انجليزى لفرنساوى .

أحمد موفق : معنى كده إنها لما تترجم من فرنساوى لعربى تقوم تترجمه
الأول لانجليزى وبعدين المترجم الانجليزى يترجمهولنا
لعربى ؟

السيسى : اسم الله عليك . . شفت سهله إزاي .

أحمد موفق : وليه اللفه دى يا سيسى بيه . . مافيه بنات كثير مؤهلات
لكده وممكن يختصروا لنا الطريق ده ؟!

السيسى : لا . . بولين دى لقطه وحرام نضيعها من إيدنا . .

أحمد موفق : بس فيه آلاف غيرها أحق منها بالوظيفة دى . . وكلهم مصريات . . اتخرجوا وقاعدين فى بيوتهم .

السيسى : المناقشة دى موش جاي منها خلاص [ثم يهمس له] أصل بولين . . جايه بتوصيه من عزمى بيه شخصيا .

■ [يمدق أحمد موفق مصعوقا ويسرع بابتلاع قرص مضاد فيسأله

السيسى] :

السيسى : يتبلع إيه ؟

أحمد موفق : سيسى زفتول . .

السيسى : [فى فرح] اللا اه . . ده إسمه على إسمى . . هات حبايه . .

أحمد موفق : موش حاتنفعك .

السيسى : ليه ؟

أحمد موفق : أصلها معانا بتؤدى مهمتها . . الزفت اللى فيها بيفسد مفعول السيسى .

السيسى : ومعايا أنا ؟

أحمد موفق : السيسى بيفسد الزفت .

السيسى : بلاش هزار . . هات [يخطف القرص ويهم بابتلاعه فيقفز القرص من فمه هاربا . . فينظران في دهشة] .

■ [لا يجد أحمد موفق بدأ من الخضوع في النهاية ويوافق على الحاق بولين بالوظيفة] .

■ [تتسلم بولين عملها في مكتب السيسى بيه بينما لجنة الاختبار برئاسة أحمد موفق مازالت مستمرة في عقد الجلسات واجراء الامتحانات للمتقدمات للوظيفة التى تم شغلها فعلا . . ويقبض اعضاء اللجنة المكافآت] .



■ صاروخ مكتب : شقة

■ [تقيم بولين في شقة مفروشة يدفع القطاع إيجارها . . وبالصدفة المحضة يكون صاحب هذه الشقة هو محمود بيه السيسى !!]

■ [أما البوتيك الملاصق لها والذي تشتري منه بولين جميع احتياجاتها فانه بالصدفة المحضة أيضا بوتيك السيسى !]

■ [وهكذا يتحقق هدف السيسى فتم لقاءاته مع حبيبة القلب والصاروخ الصاعد بولين حيثما وحينما يريد] .

■ [والسيسى من النوع الذى يقبل على الدنيا بنهم شديد فيغترف من اللذات الحسية والأطعم الدنيوية (النساء - الطعام - الشراب - السلطة . . الخ) كأنها فرصته الأخيرة] .

■ [يكتشف العاملون في القطاع أن بولين لا تقوم بأى عمل في موقعها تستحق عليه المرتب والحوافز الضخمة التي تحصل عليها دونهم . . . ويدرك أحمد موفق أن حالة العمل لم تكن في حاجة إليها إطلاقا ، وأن كل المطلوب كان مجرد تشغيل فتاة النينجا هذه . . . وفي مكان قريب من حبيب القلب] .

■ [ويندم أحمد موفق على أنه وافق على تعيينها من البداية . . . ويتندر عليه العاملون بالقطاع ويطلقون عليه إسم أحمد موافق بدلا من موفق] .

■ [في نفس الوقت تعامل بولين زملاءها وزميلاتها بتمال وازدراء مما يثير حفيظتهم ضدها ويشكونها للسيسي بيه فينصرها عليهم بالطبع ويوقع عليهم جزاءات وعقوبات . . . فيدخلون جحورهم ويلوذون بالصمت] .

■ [يتعرض أحمد موافق ذات مرة لإهانة من بولين فيقتحم حجرة السيسي طالبا التحقيق فيقول له الأخير] :

السيسي : روق كده وما توديش نفسك في داهيه . . .

أحمد موفق : ليه ؟

السيسي : [هامسا] بولين دى أصلها تبع عزمى بيه . . .

أحمد موفق : تبعه ازاي يعنى ؟ حضرتك قلتلى انه موصى عليها بس ؟

السيسي : [هامسا] سر لأول مره حاقوله . . . بولين تبقى مراته . . .

أحمد موافق : [مصعوقا] إيه !!

■ [ينصرف أحمد موفق وهو يفكر ماذا يفعل ليرد كرامته . . ويهتدى أخيرا إلى الحل . . وهو أن يستمر مع اعضاء اللجنة في عقد الامتحان للمتقدمات لوظيفة المترجمة وقبض المكافآت] .



■ المطب :

■ [تتسرب إشاعة أن بولين هي الزوجة السرية لعزى بيه . . ويكون هذا بمثابة الانقاذ للسيسى بيه إذ يبعد عن نفسه الشبهة . . وفي نفس الوقت يضمن أن تنخرس جميع الألسنة] .

■ [عزمى بيه له ابن فى الخامسة [آخر العنقود] إسمه أيمن يصطحبه معه إلى المكتب ذات مرة فيخرج أيمن بعد قليل ليسلم على أنكل سيسى فى مكتبه] .

■ [يجلس أيمن فى حجرة السكرتيرة مع الزوار المنتظرين بينما اللبنة الحمراء مضاءة فوق باب مكتب السيسى . . ويسأل زائر السكرتيرة وقد ملّ من الانتظار] .

الزائر : هو مين اللى عنده جوه ؟

السكرتيرة : مرات عزمى بيه .

■ [وهنا يقفز أيمن صائحا . . ماما . . ثم يندفع إلى الحجرة ويفتح الباب فيرى مشهدا عجيبا . . ويفاجأ به السيسى وبولين فينفضلان

عن بعضها بسرعة .. ويتمكن السيسى بطريقة أو بأخرى من احتواء أيمن] ..

■ [في المنزل يفاجيء أيمن والدته بأن يقول لها في براءة] :

أيمن : أنا مبسوط أوى يا ماما عشان أنا أشطر من أصحابى كلهم ..

بولين : ليه بتقول كده يا حبيبي؟؟

أيمن : أصل كل واحد فيهم عنده ماما واحده لكن أنا عندى اثنين .

بولين : إيه؟

أيمن : آه .. عندى ماما هنا في البيت بيوسها بابا .. وماما ثانيه

هناك في المكتب بيوسها له أنكل سيسى ..

■ [تصعق الأم وتنتظر حتى يصل عزمى بيه فتطلق عليه صواريخ

غضبها دون أن يعرف لذلك سببا] .



■ الفرصة الأخيرة .. بعد الألف :

■ [يقف السيسى ذليلا أمام عزمى الذى وقف على حقيقة الأمر كله] .

عزمى : [صائحا] أنا زهقت منك ومن عميلك .. القطاع بقت

سمعتة زى الزفت .

السيسى : يا فندم دى إشاعات .. ناس حاقدين مغرضين عاوزين

يعطلوا الانتاج .

عزمى : إنت لسه بتقاوح .. تصرفاتك السافلة دى بتطرش على
أنا كمان .. المسئولين الكبار بيسألونى عنها .. إتلم بقى
طاوعنى ..

السيسى : [نظرة إلى الأرض] حاضر .. حاتلم ..

عزمى : ودى آخر فرصه يا سيسى .


■ [يخرج السيسى سعيدا بالفرصة الجديدة بينما يروح عزمى فى تفكير
عميق ..

■ [أما اللجنة برئاسة أحمد موافق .. فما زالت تعقد الامتحانات
للمتقدمات للوظيفة وتقبض المكافآت] .



الفضيحة الخامسة

ابن الكُبة طلع القبة



موظفة : [تتصعب بفمها] آل على رأى المثل . . إبن الكُبة طلع القبة
. . وابن اسم الله على باب الله !

الجميع : [ضحك] .

زميلة : من ناحية كُبة فهو كُبة فعلا . . أول مره اشوف راجل كُبة .

موظف : هاهها بس المثل ده ينطبق على اللى حاصل عندنا دلوقتى
بالضبط . .

■ [وكان محمود السيسى رئيس القطاع قد استدعى ذات يوم الاستاذ

فنجارى مدير شئون العاملين وسأله] :

السيسى : مافيش عندك وظيفة فاضيه فى القطاع ؟

فنجارى : ولا الهوا يا بيه .

السيسى : دى عشان طالب مكافح .

فنجارى : وكم ان لسه تلميذ ؟ هو احنا ملاحقين عالخرميجين لما نعيّن
تلامذه . . يروح يتلهى على عينه يكمل تعليمه الأول .

السيبي : ما هو عاوز يشتغل من دلوقتى عشان لما يتخرج يلاقى
الوظيفة محفوظة له .

فنجارى : للأسف يا سيبي بيه . . فيه استحاله . . داحنا عندنا
تكدرس كمان فى الموظفين . . خليه قاعد عند أمه . .

السيبي : الطالب ده يبقى ابني عامر .

فنجارى : [يصعق ثم فى حماس مفاجيء] الوظيفة موجودة وجاهزة من
زمان يا سعادة البيه . .

السيبي : غريبة !

فنجارى : طيب تصدق بيايه . . أنا كنت حاقتح على سيادتك انه لو
عندك ابن ييجى يشتغل معانا هنا فى القطاع عشان نستفيد
من خبراته ، اسم النبي حارسه وصاينه . . بس سيادتك
سبقتنى وخذتها من على لسانى . .

السيبي : طيب حانوظفه فين ؟

فنجارى : كل إدارات القطاع تحت أمره .

السيبي : يمكن ما يلاقيش نفسه فى أى إداره منهم !

فنجارى : مافيش مشكلة . . ننشئ له إدارة جديدة على مزاجه ونوظفه
فيها . .

السيبي : لاحظ إن سنه صغيره . . يعنى لسه حدث . .

فنجارى : تاهت ولقيناها . . نعمل ادارة اسمها [إدارة الأحداث] دى
حتى حالة العمل هنا كانت تحتم وجود الإدارة دى عندنا من
زمان . .

السيسى : بس موش حانقدر نعيه من غير مسابقة . . لازم نعمل ولو
حتى مسابقة شكلية كده زى اللى عملناها عشان بولين . .

فنجارى : من غير مسابقة يا باشا . . سيادتك بصفتك رئيس قطاع من
حقت قانونا إنك تستخدم الأشخاص اللى ترى إن العمل فى
حاجه إليهم عن طريق التعاقد الشخصى بمكافأه شاملة لمدة
سته اشهر تتجدد من تلقاء نفسها . .

السيسى : حايبقى مؤقت يعنى ؟

فنجارى : لحد بس ما المحروس يتخرج . . حاكون أنا بقى مدكّن له
درجة فى الميزانية . . يقوم ينتقل عليها لانه أحق واحد بيها . .
ويستنى من أى مسابقة تقام للوظيفة دى . . شفت بقى إن
المسأله فى إيد سيادتك !؟

السيسى : ما تنساش إن القانون مدينى صلاحية التعاقد دى عشان
استعملها فى الاتفاق مع الكفاءات والخبرات النادرة بس . .

فنجارى : وهو فيه أكفأ ولا أخبر ولا أندر من ابن سيادتك ؟ فيه حد
بالعبقريه بتاعته دى فى التخصص ده بالذات ؟

السيسي : تخصص إيه ؟! ده لسه حايتمرن في إدارة الأحداث الجديده
دى ..

فنجارى : ما هو ده اللي أنا أقصده .. المحروس لسه حدث ..
وبالتالى فهو أكثر من يشعر بأحاسيس الأحداث وأحلامهم
ويعرف لغتهم ويتكلم باسمهم .. يبقى خبير ولا لأ؟!!

السيسي : إنت شايف كده؟!!

فنجارى : طبعا يا سيسي بيه .. دى الاداره الجديدة دى حاتسد فراغ
كبير أوى .

السيسي : بالمناسبة .. هى الإدارة دى حاتعمل ايه ؟

فنجارى : [يفتح فمه في بلاهة متسائلا] هه؟!!

السيسي : باقول لك الإدارة دى حايبقى تخصصها إيه يعنى ؟

فنجارى : إدارة إيه ؟

السيسي : إدارة الأحداث دى ..

فنجارى : مالها ؟

السيسي : شغلها إيه ؟ حاتنتج إيه ؟

فنجارى : هى مين دى ؟

السيسي : الإدارة .

فنجارى : يتفتح فمه تائباً لله !

السيسى : صندحاً عبقاً .. حاتمياً به !

فنجارى : وقد وجد حياً .. ممدداً أحدث يبقى هاتعبر حوذاً ..



■ الطفل المعجزة :

■ [وتتحقق مقونة فنجارى إذ تقع حوادث كثيرة منذ سلاخ النجر
العزيز (عمر) لتوظيفة .. ألقها حضوره لنعلم مرتباً نشورت أو
الترنج سوت .. واشترطه أن يكون له خمس سكرتيرات .. وسته
تدبرن فعلاً .. ولا يجدن بالضع مكاناً لجنوسهن فيجتمع عمرهن
في النادى حيث يراس الكلال مهام وظائفهم أثناء التسباحة في
الين] .

■ [توزع على الطفل المعجزة اختصاصات وأعمال كثيرة بحصر بموجبها
على بدلات ومكافآت وحوافز ضخمة . بينما الموظفون الأصليون ذوو
الأقدمية والخبرة لا يكلفون بأى عمل ويقبعون في انتظار التفرج .
وهكذا يتحقق المثل .. إذ يطلع هو القبة بينما الكفاءات تبقى عن
باب الله] .

■ [يشكون هذا الوضع المقلوب لعزى بيه رئيس السيسى بيه . ولكن
الأخير يسوق له مبررات كاذبة يصدقها عزى بيه . ويطلق يده في
القطاع أكثر من ذى قبل مما يصبب العاملين فيه باليأس فيقول
بعضهم] :

بعضهم : عزمى بيه عمال يسمنه ويقويه لحدّ ما حايNDAR عليه فى يوم
من الأيام ويعضه هو شخصيا .

■ قطاع العيبة وقطاع الخيبة .

■ [تنقسم المؤسسة إلى قطاع المشروعات (حيث فرصة السلب والنهب
والانحراف وشيلنى واشيلك) ويرأسه محمود السيسى ، المعروف
بسلطة لسانه ولهذا أطلقوا على القطاع اسم . . قطاع العيبة . .
وقطاع المعروضات ومهمته أن يعرض السلع التى تأتية من قطاع
المشروعات . . وهو قطاع متخاذل لا يبهش ولا بينش . ولذا فقد
سموه « قطاع الخيبة » .]

■ [تتم ترقية عامر السيسى إلى منصب مدير ادارة فيتقرر تخصيص
حجرة مكتب له علاوة على حجرة سكرتارية ولكن . . لا يوجد فى
القطاع ثقب إبرة . . فما العمل ؟!]

■ [يعلم قطاع العيبة بتاريخ خروج مديرة معينة فى قطاع الخيبة إلى
المعاش . . وفى اليوم المحدد وبمجرد أن تجمع المديره أوراقها الخاصة
يهجم زبانية قطاع العيبة على حجرتها ويحتلونها . . وعبثا يحاول
رئيس قطاع الخيبة أن يخرجهم منها وكان قد خصصها لمدير آخر إذ
يجلبونه إلى السيسى بيه الذى يعلن أن الحال سيبقى على ما هو عليه
وعلى المتضرر أن يلجأ إلى الملاجىء . . وأنه لن يتركها إلا بالطبل
البلدى . . وتبدأ رحلة البحث عن الطبل البلدى] .

■ [بينما أحد كبار موظفى قطاع الخيبة فى أجازة مرضية يستولى قطاع

العيبة على حجرة مكتبه حيث انها ملاصقة للحجرة السابقة . . ويتم تخصيص الحجرتين لعامر السيسى وهيئة مكتبه . . ويعود صاحب الحجرة من أجازته ويحاول إخراجهم منها ولكن . . لابد من الطبل البلدى] .

■ [يخرج موظف في قطاع الخيبة من مكتبه متوجها إلى دورة المياه . وما أن يتعد قليلا عن باب الحجرة حتى يقتحم زبانية قطاع العيبة الحجرة ويحتلوننا لصالح القطاع] .

■ [من بعد هذه الحادثة يتمسك كل موظف في قطاع الخيبة بمكتبه ، ويبقى بداخله منذ لحظة وصوله حتى مواعيد الانصراف ويرفض أن يغادره لأى سبب مهما كان] .

■ [يجتمع السيسى ببعض معاونيه ويبحثون هذه المشكلة] .

السيسى : لازم نشوف طريقة نخرجهم بيها من مكاتبهم . .

أحدهم : نعمل حريقة وهمية . .

السيسى : لا . . شربة ملح أو أى بودرة مسهلة واخلطها في علبة الشاى

اللى بيستعملها البوفيه بتاع القطاع ده . .

أحدهم : فكره هايله . .

■ [يفاجأ العاملون بقطاع الخيبة ذات يوم بأسهال شديد يصيب

بعضهم مما يضطرهم لمغادرة مكاتبهم مسرعين إلى دورات المياه . .



وكانت هذه هي اللحظة المتظرة .. إذ يهجم مندوبو قطاع
المية على هذه الحجرات ويحتلون ويغلقونها دونهم و .. في انتظار
الطبل البلدى] .

■ [في المرحلة التالية يكف الكل عن الذهاب إلى دورات المياه نهائياً
ويحتفظ كل موظف بقصرية داخل مكتبه .. وتروج تجارة القصارى
داخل وخارج المبنى] .



■ [يصرخ العاملون بالقطاع والمتعاملون معه قائلين .. يا ناس يا
هوه .. حانفضل في الهّم ده لحدّ امتى ؟ . ويثون عزمى بيه
شكواهم فيحيلهم إلى السيسى الذى ينكل بهم أشد تنكيل ..
فينصرفون ورؤوسهم مطأطأة ، ويصبح أحدهم] :

أحدهم : بالشرف لحايعضه في يوم من الأيام !

■ نقاوة عيني :

■ [وصحت توقعات المظلومين .. فبعد رحلة قصيرة إلى الخارج يعود
عزمى بيه فيفاجأ بمحمود السيسى قد شغل مكانه .. ويجرى
معاونوه هنا وهناك بحثاً عن الطبل البلدى] .

■ [عزمى يجشد كل أسلحته .. وعندما يكتشف السيسى أنه عضمة
ناشفة .. يترك له المكان قائلاً] :

السيسى : والله العظيم كنت باحافظ لك عليه وانت مسافر !

الفضيحة السادسة

السياسي بيه
مسك سبحة



■ السبت

نعيم : صدقنى لما أقول لك إن كلمة سيسى دى مشتقة من سوس .

كريم : وإيه الصلة بينهم !؟

نعيم : الله . . معروف إن السوس بينخر فى الأشياء الجميلة لحدّ ما يتلفها ويفسدها ويقضى عليها . .

كريم : لا يا أستاذ . . السيسى ده فصيلة أو نوع معين من الخيل . .
بس قزم وحجمه ضئيل . . وموجود منه فى جنينة الحيوانات . .
وهو اللى بنشوفه يجر كارتة صغيرة يركبها الأطفال .

نعيم : غلط . . علميا بقى . . السيسى ده حيوان ينتج من التهجين
بين فصيلتين مختلفين تماما . .

كريم : إيه هما !؟

نعيم : فصيلة الخيل وفصيلة الحمير .

كريم : أنا أعرف إن لو حمار تجوز فرسة بيخلفوا بغل . .

نعيم : مضبوط .. لكن لو حصان التجوز حماره حاجيبوا سيسي ..

كريم : وده اسمه العلمى بقى!؟

نعيم : أيوه .. وعالعموم البغل أو السيسى بيبقى عقيم .. يعنى مفيش منه أى رجا .

كريم : إنت عاوز الصراحة .. السيسى بقى لا ده ولا ده ولا ده ..

نعيم : آمال إيه؟

كريم : ده لفظ بيطلق دلوقتى على كل رئيس منحرف مسئول عن موضع معين فى الدولة وعمال يفسد فيه زى ما هو عاوز ..

نعيم : ده كلام علمى بقى ولا أدبى؟

كريم : لا .. ده قلة أدبى ..

نعيم : هاهاها ..

كريم : والغريب إن مجموعة السيسى دول لهم نفس المواصفات ويتبعوا

نفس الأساليب .. يعنى مثلا تلاقى موظف يقول لمراته إيه ..

جابولنا مدير جديد النهارده يا ستى .. فتسأله .. شكله إيه؟

فيقول لها .. طلع سيسى .. تقوم تشهق . وتخبط على

صدرها وتقول .. يا لهوى ! ..

نعيم : [يهمس] هش ش ش ش ش .. وصل .

■ [يلتفت الاثنان في اتجاه معين فيلمحان السيسى به متجها إلى مكتبه وهو يمشى الهوينى وفي يده مسبحة وقد سبل جفنيه وراح ييسمل ويجوقل . . وخلفه رجاله تحت قيادة تابعه الوفى (وفائى) فيصمت نعيم وكريم حتى يخفى الموكب ثم يسيران إلى مكتبهما وهما يستأنفان الحوار] .

نعيم : تفتكر انه اتغير فعلا ؟

كريم : يهدى من يشاء . . يمكن اتهد وتاب وعرف إنه مهما عمل فلن يخرق الأرض ولن يبلغ الجبال طولاً . .

■ [يدلف السيسى إلى حجرته يسبقه تابعه وصفية يفسح له الطريق وسط الموظفين والمرؤوسين الذين تزاخوا لالقاء تحية الصباح . . فيرد عليهم السيسى قائلاً] :

السيسى : بارك الله فيكم . . بارك فيكم وأبقاكم . .

■ [وينصرفوا بعدها ، ولا يبقى سوى مديرى الادارات للاجتماع اليومى معه . . يتقدم السيسى نحو مكتبه وهو يردد] :

- بسم الله الرحمن الرحيم . . نبدأ العمل . . بس قبل كده عاوز أقول لكم يا اخوانى . . نصيحه منى . . ماحدث واخذ منها حاجة والله . . هيه . . أول بند عندنا إيه النهاردة ؟

■ ■ : المسابقة اللى إحنا عاملينها . .

السيى : مسابقة إيه ؟

■ ■ : عشان تعيين موظفين جداد لأمن المؤسسة .

السيى : اتقدم لها كتير ؟

■ ■ : خمس تلاف ..

السيى : ما شاء الله ..

■ ■ : بس الغريب إن فيهم حوالى ميتين بنت ..

السيى : (تبرق عيناه فجأة) ميتين بنت ؟! [يردد لنفسه سرا] ويرزقكم من حيث لا تعلمون ..

■ ■ : بتقول حاجة سيادتك ؟

السيى : آه .. باقول إن البنات دول هم اللى حانختبرهم اختبار شخصى ..

■ ■ : طيب والشبان ؟

السيى : يستبعدوا فوراً ..

■ ■ : يعنى إيه ؟ بنات هم اللى حايمنسكوا الأمن ؟!

السيى : طبعا .. البنت عندها جلد وصبر وشجاعه أكثر من الولد ..

■ ■ : إزاي ده ؟!

السيسى : يا خوانا . . مين اللى بيبقى مسئول عن البيت . . ويعيش عليه . . الست ولا الراجل ؟

المجموعه : الست طبعا . .

السيسى : مين اللى بيحافظ على هذا الكيان ويوفر له الأمن والأمان ؟

■ ■ : الست طبعا . .

السيسى : وده اللى مطلوب تحقيقه فى المؤسسة . . هيه [يتلمظ بلسانه] وشكلهم إيه البنات اللى اتقدموا دول ؟

■ ■ : نصهم تقريبا محجبات .

السيسى : أعوذ بالله . . يستبعدوا فوراً . .

■ ■ : ليه ؟!

السيسى : سبحان الله يا أختى . . بنت محجبة . . إزاي بقى حانطلب منها انها تسيب الحجاب والفستان المستور عشان تلبس اليونيفورم ؟

■ ■ : أنهى يونيفورم ؟!

السيسى : اللى حايلبسوه البنات بتوع الأمن . . موش ممكن طبعا المحجبة تلبسه . .

■ ■ : وشكله إيه اليونيفورم ده ؟!

السيسى : حانعمل لجنه عشان تختاره . . شىء جميل طبعا إن بنات الأمن كلهم يبقوا لابسين يونيفورم واحد من بره ومن جوه .

■ ■ : ومن جوه كمان؟!!

السيسى : طبعا . . وعشان كده أنا اللى حانقيه وأقيسه عليهم بنفسى . . عشان أطمئن إنه يكون حشمة .

■ ■ : كل حاجة تعملها بنفسك كده ؟ سيادتك بتهلك نفسك فى الشغل!

السيسى : [يتنهد] هيبه . . عن اذنكم اخش الحمام أجدد وضوئى عشان أبقى جاهز للظهر .



■ الأحد

نعيم : [نائرا] قلت لك ديل الكلب عمره ما ينقام .

كريم : حرام عليك . . دى السبحة ما بتفارقش إيدته .

نعيم : بيعد عليها الفلوس اللى حاتيجى له من البدلات ومكافآت اللجان الوهمية والحوافز الشهرية . .

كريم : مافيش مرة حد يخش عليه غير لما يلاقيه فارد السجادة ويصلى . .



نعيم : عشان عارف إن فيه حد حايخس عليه .

كريم : ده سايب دقنه . . الظاهر حايريبيها .

نعيم : لا . . دول شوية وساخة . . لو غسل وشه حاتنزل على طول .

كريم : طيب والزيبه اللي في قورطه ؟

نعيم : دى زيبه تركيب . . بتتباع في أى بوتيك .

■ [في مكتب السيسى بيه . . يكون قد انتهى لتوه من اختبار إحدى

المتقدمات للوظيفة وهى فتاة صارخة الجمال ، ملفوفة القوام ،
ويودعها إلى الباب وهو ينظر لها وقد تدلى لسانه وتساقط لعابه] .

■ [وما أن تخرج حتى يحدته تابعه وفائى قائلاً] :

وفائى : أنا قرئت في عين سيادتك كلام كبير أوى . .

السيسى : أن الله جميل يحب الجمال يا أختي . .

وفائى : بس ما تنساش إن النظرة الأولى لك والثانية عليك . .

السيسى : ما هي بصّة واحدة اللي بصيتها لها وفضلت حاطط عيني

عليها ما نزلتهاش لحدّ ما مشيت . . فين بقى النظرة الثانية

الى بتقول عليها دى ؟ .

وفائى : صح . . كده تبقى في السليم . .

السيسى : قوم نخطف العصر .. الصلاة الوسطى .. دا تأخيرها
مكروه .



■ الخميس :

السيسى : هيه .. الفواتير اتظبطت كويس ؟

وفائى : ما تخزّش الميه يا سيسى بيه ..

السيسى : إوعى يا وفائى ..

وفائى : إطمئن .. والمبلغ حطيته فى حسابك الجارى فى البنك .

السيسى : طيب ما تنساش الحضرة الليلة فى السيده نفيسه .. بعد
صلاة العشا ..

■ الخميس التالى :

■ [شينا فشيئا تنكشف ادعاءات السيسى للعاملين فى المؤسسة وتفشل

تمثيلياته فى تخديرهم وتتصاعد رائحة الفساد والانحراف حتى تزكم

الأنوف ، فتثور ثائرتهم ويرسلون عشرات الشكاوى والبرقيات من

جديد] .

وفائى : أنا خايف العيار يفلت يا سيسى بيه .. [هكذا يقول له تابعه

ونديمه وفائى] .. حاتعمل إيه ؟

السيسى : حاتعمل عمرة !

وفائى : ينصر دينك .. هى دى ..



نعيم : دى دعوة مجانية جاية له ..

كريم : أهو حايتهمر وخلص .

نعيم : العُمره ما تنفعرش .. ما دام قادر يبقى لازم يروح من حر ماله .

كريم : يا سيدى .. من حر ماله .. من حر ما لهم .. أهى من حر مال أى حد وخلص ..



■ بعد عشر أيام :

■ [يعود السيسى بيه إلى المؤسسة فيستقبل استقبال الفاتحين ، وتمتلىء

المكاتب والممرات بلافتات الترحيب التى قام رجاله بتعليقها مسبقاً

.. ويتبرك به العاملون الذين تلقى كل منهم هدية مناسبة (مسبحة

/ سجادة / جلباب / .. الخ)

وقد بدت على السيسى بيه مظاهر التقى والورع مما يوحى بأن الفساد قد

ولى إلى غير رجعة .. فيتنفس الجميع الصعداء] .

■ [فى مكتب السيسى بيه ينفرد بتابعه وفائى بعد خروج المهنيين]

وفائى : مبروك العمره يا فندم ..

السيسى : أنا عملت ثلاث عمرات موش عمرة واحدة .

وفائى : مقبولين .. بس على الله ما تكونش تعبت فى السفر ..

السيسى : سفر؟! .. وحاسافر ليه؟

وفائى : عشان تعمل العمرات دى ..

السيسى : أنا عملتهم وأنا هنا يا مغفل .

وفائى : موش ممكن .. عمرات إيه دول؟

السيسى : عمرة للعربية وعمرة للمحل وعمرة سباكة للحمام .. يبقوا
ثلاث عمرات .


وفائى : إيه؟!!

السيسى : [ينفجر ضاحكا] هاهاها هاهاهاها



الفضيحة السابعة

الراقصة والسياسي



نعيم : البلد كلها بتتكلم عن السيسى بيه ونوسة .

كريم : نوسه مين ؟

نعيم : شيل إيدك !

كريم : أشيل إيدى من إيه ؟!

نعيم : هاها موش انت .. دى الرقاصة اسمها كده .. نوسة شيل إيدك!

كريم : [مدهوشا] أبوها اسمه شيل إيدك ؟!

نعيم : لا .. ده الاسم الحركى بتاعها .. أصل ماحدث بيشوفها وهى بتتلوى قدامه غير لما يروح مادد إيده على طول .. تقوم تقول له شيل إيدك .. تخلص منه تلاقى واحد تانى مد إيده .. تشخط فيه .. شيل إيدك .. واهى على كده طول ما بترقص .. شيل إيدك .. شيل إيدك .. لحد ما سموها نوسه شيل إيدك .

كريم : والسيسى بيه بيمد إيده راخر ؟

نعيم : يووه . . ده بيريل عليها . . بكره حاتلاقى كل ادارات المؤسسة بتاعتنا بجميع إمكانياتها تحت أمر الأسطى نوسه دى . .

كريم : وانت عرفت المعلومات دى منين ؟!

نعيم : انت موش عايش فى الدنيا واللا ايه ؟ . . عرفتها طبعا من الجريدة اللى متولية أخبار رؤساء القطاعات فى البلد أول بأول . . دى كاتبة النهاردة مقالة مجننة السيسى بيه . .

كريم : مقالة عن إيه ؟

نعيم : عن فيلم الراقصة والسياسى . . حضرته بيؤكد إن الفيلم ده مقصود بيه هو ونوسه .

كريم : لكن هو اسمه السيسى والفيلم اسمه السياسى !!

نعيم : بيقول انهم مزودين الألف دى للتمويه بس . .

كريم : هاها . . إنت شوقتنى أوى لقراءة الجريدة دى . . هى اسمها إيه ؟

نعيم : السيسى جازيت .

كريم : حابعت أجيبها حالا . .

نعيم : السيسى بيه مانع دخول الجريدة دى المؤسسة . . الأمن بيفتش

الموظفين فى الدخول والخروج . . والى يضبطوا معاه نسخة منها
بيتحول للتحقيق فوراً . .

كرىم : حانزل تحت اشترىها بنفسى واقراها من بره بره . .

نعىم : ماتحاولش . . ده طرد كل بىاعين الجرايد الى قدام المؤسسة .

كرىم : الله . . طيب ما هو عارف أننا ممكن نشترىها من أى حتّه
تانية .

نعىم : مفيش . . العدد الى فيه فضايح السيسى بالذات الناس بيتها
بيتهافتوا عليه وبينفد من السوق بعد ساعة . . دانا سمعت إن
الجريدة حاتطلع ملحق . .

كرىم : ملحق للسيسى جازيت ؟

نعىم : أبوه . . السيسى المسائى . .

كرىم : خلىنا فى الصباحى . .

نعىم : اسمع . . زميلتنا أحلام عندها نسخة من العدد مخبياها فى
مكان أمين فى تواليت السيدات . .

كرىم : استلفها لى منها خمس دقائق .

نعىم : طيب ما كل الموظفين هنا عاوزين برضه يقرؤا فضايحه مع نوسه
شىل إيدك . الحل الوحيد اننا ننقل المقالة على الآلة الكاتبة
ونعمل منها كام صورة ضوئية نتبادل قراءتها . .

كريم : بس نصورها فين ؟ . . إنت ناسى إن السيسى بيه مصادر كل
مكن التصوير اللى فى المؤسسة ما عدا المكنة اللى فى مكتبه ؟
ولازم إذن منه شخصيا . .

نعيم : [يستغرق فى التفكير ثم تبرى عيناه فجأة] أنا حاربتها مع تنظيم
الموظفين الأحرار .



■ [مدير المكتب من التنظيم يدس المقال المراد تصويره داخل دوسيه
أوراق يقدمه للسيسى بيه فيقوم الأخير بتوقيعها ورقة وراء أخرى دون
أن يهتم بفحصها ، مكتفيا بتعليق مدير المكتب على كل منها . .
وعندما يصل إلى ورقة المقال يتوقف ويسأله عنها . . فيرتبك مدير
المكتب قليلا ولكنه يتمالك نفسه بسرعة ويقول] :

مدير المكتب : ده يا فندم المنشور اليومى بتاع الجزاءات اللى سيادتك
بتوقعها على الموظفين .

السيسى : خفيف النهاردة ولا نص دسم ؟

مدير المكتب : لا ده كامل الدسم . . فيه سبعة لفت نظر واتناشر انذار
. . وثمانية خصم من المرتب وستة فصل نهائى . .

السيسى : ايوه كده افتح نفسى عالصبح .

مدير المكتب : وعاوزين نصور منه نسخ بعدد الموظفين اللى ورد اسمهم
فيه .



السيسى : الأجدع بقى انك تعمل منه صور بعدد موظفى المؤسسة كلهم ويتوزع عليهم عشان لما يقروه يقوموا يعرفوا مين محمود السيسى ويمشوا جنب الحيط « يكتب » يصور حالا مائة صورة . . وأدى توقيعى أهو [يوقع] .

■ [مدير المكتب يعطى لنعيم المقالة وعليها أمر السيسى بيه ، فيسرع بها إلى فنى جهاز التصوير الذى يقوم بتصوير العدد المطلوب ، بينما موظفو المؤسسة ينتظرون فى مكاتبهم فى لهفة على تسلم الصور . . وتظهر أمام نعيم مشكلة توزيعها عليهم بعيدا عن عيون السيسى المنبثة فى كل مكان] .

■ [ينتهى التصوير ويحمل نعيم الصور ويهم بالخروج حين يفاجأ بدخول السيسى بيه ومعاونيه أثناء مروره الصباحى على المكتب فيتسمر نعيم فى مكانه مصعوقا] .

السيسى : وصلتنى معلومات إن المقالة إياها بتتوزع المؤسسة زى المنشورات . .

نعيم : [يكاد يسقط من طوله] منشورات إيه يا فندم ؟؟ حانفتش المؤسسة شبر شبر . .

■ [نعيم يتهاسك بعد قليل ويدرك ضرورة التخلص من الحِمْلِ الخطير . . وتواتيه فكرة جهنمية . . يأتى بطفاية سجائر ممتلئة ويسكب مابها من رماد وأعقاب سرا على ظهر السيسى بيه ثم ينبه إليها قائلاً] :

نعيم : إيه اللي فى الجاكتة ده يا بيه ؟!

السيسى : فين فين ؟!

■ [يخلع السيسى الجاكتة ويقوم نعيم بتنظيفها وأثناء ذلك يضع النسخ فى جيوبها ثم يعيدها إلى السيسى بيه الذى يحملها على يده . . بينما يقوم معاونو السيسى بتفتيش جهاز التصوير والحجرة ولا يجدون المنشورات بالطبع فيصرفون] .

■ [فى مكتب آخر يدخله السيسى خلال جولته يلقى أحد الموظفين ببعض الأحبار على جاكتة السيسى سرائم ثم ينبه لوجودها . . فيثور السيسى قائلا] :

السيسى : هى الجاكتة دى منحوسة النهاردة كده ليه ؟!

■ [الموظف أثناء تنظيفه للجاكتة يلتقط من جيوبها نسخا بعدد زملائه فى الحجرة ثم يعيد الجاكتة للسيسى الذى يخرج مع معاونيه بعد تفتيش دقيق للحجرة لم يعثروا فيه على المنشورات] .

■ [ويتكرر نفس الشئ فى مكتب ثالث حيث ينسكب على جاكتة السيسى بعضا من عصير قدمه له الموظفون ، وأثناء تنظيفها يأخذون من جيوبها صورا من المنشورات بعددهم . . وهكذا يتم توزيع المنشورات على جميع موظفى المؤسسة بواسطة السيسى دون أن يدري] .

■ [يقرأ العاملون المنشورات فتنتلق الضحكات وتجلجل القهقهات فى المكاتب والأروقة . . وتصل إلى أسماع السيسى ويعلم عن طريق عيونه المنبثة بالسبب فيثور ثورة عارمة] .

■ [يتمكن الأمن من ضبط بعض المنشورات مع أحد الموظفين
وينكشف السر كله .. ويخبرون السيبي بأن جاكته شخصيا
كانت هي أداة التوصيل فيكذبهم .. ثم يدس يده في أحد جيوبها
فتخرج وبها باقى المنشورات فيقع مغشيا عليه] .

■ [فى اليوم التالى والجميع يتوجسون خيفة .. يصل السيبي بيه فيسرع
إليه تابعه وفائى] .

السيبي : أنا اتخذت إجراء حايعيد الأمور الى نصابها هنا .. والله
لاوريهم ..

وفائى : الرحمة يا فندم ..

السيبي : أبدا .. أنا يلعبوا بى ويستغلوا جاكنتى بالسفالة دى ؟

وفائى : طيب سيادتك عملت إيه ؟

السيبي : حرق الجاكتة دى خالص .. ولبست جاكته جديدة
أهى .. شوف [يلف حول نفسه] بفتحتين من ورا ! .. !

الفضيحة الثامنة

السياسي ييه
كسب القضية



مدير العلاقات : بكرة حانعمل احتفال انقح من اللى عملناه يوم ما سيادتك كسبت القضية اللى فاتت .. أنا مجهز نفسى تمام .. والكل واقف فى وضع استعداد .. وأول ما يبلغونا بالحكم حانبتدى مهرجان النصر على طول ..

السيسى : وليه نستنى لحدّ ما يبلغونا ؟ إنت عندك ذرة شك فى إنى حاكسب القضية دى والا إيه ؟

مدير العلاقات : لا طبعا .. لأن سيادتك صاحب حق ..

السيسى : ده سبب واحد من عدة أسباب .. [تتفخ أوداجه] وأصلى ما اتعودتش إنى أخسر قضيه أبدا .. [ينفجر ضاحكا فجأة فيتناثر من فمه كالعادة رذاذ يصيب وجه محدثه] هاهاهاها ..

مدير العلاقات : [وهو يدير وجهه بعيداً متظاهراً بالبحث عن شىء وهمى بالحجرة ليتفادى إفرازات رئيسه] وسيادتك ناوى تروح المحكمة بكرة إن شاء الله ؟ ..

السيسى : واروح ليه ؟ .. مانا متأكد من الحكم .. حابعت
الأستاذ وفائى ..



■ [فى صباح اليوم التالى يتوجه الأستاذ وفائى (صوت سيده) إلى المحكمة حيث يجد جميع العاملين بالشئون القانونية بالقطاع قد سبقوه إلى هناك لسماع الحكم] .

■ [فى نفس الوقت يصل السيسى إلى القطاع فيجد إلهامى فى انتظاره وقد زُينت الممرات بأقواس النصر والمشايات الحمراء والورود والتعاليق .. بينما ينبعث من السماعات فى الأركان صوت أم كلثوم وهى تغنى (نصرة قوية .. وفرحة هنية) . فيبتسم السيسى فى زهو وثقة .. وتلفت نظره لافتات مدلاة من السقف وملصقات على الجدران تحمل عبارات التهئة والانتصار العظيم والفوز فى القضية ..
فنقرأ مثلاً :

داعين لك بالنصر يا سيسى ..

ولخصمك بالعلم الحيسى !]

■ [ما أن يسير بضع خطوات حتى يفاجأ بفرقة موسيقى حسب الله تظهر من ممر فرعى بينما تظهر فرقة مزمار صعيدى من ممر آخر .. وتعزف الفرقتان موسيقى راقصة تأتى على أثرها مجموعة من السكرتيرات الفتات فى ملابس « مادونا » وهن يرقصن ويتمايلن على أنغام الموسيقى ، ثم يحطن بالسيسى بيه وتنطلق الضحكات

والزغاريد ، فيهمس السيسى فى أذن مدير العلاقات ضاحكا] ..

السيسى : ■ مادام الحكاية لذيدة كده .. يبقى كل يوم حاعمل

قضية .. [ثم ينفجر ضاحكا على نكتة فيصيب الجميع بالرداذ] .

■ [تدخل مجموعة من الفاتنات يحملن صوانى الشربات والشوكولاتة

وعلب ملبس فضية كُتب بداخلها « بالرفاء والبنين .. والنصر المبين

.. عقبال كل المسئولين الملطوظين » .. ومن الخارج ختمت كل

علبة بختم النسر] .

■ [يلتهم السيسى الشوكولاتة بفمه والفتيات بعينه ، ثم ييلع بكوب

من الشربات يتجشأ بعده وهو يقول لإهامى] :

السيسى : عفارم عليك !

إهامى : لأ ولسه يا بيه .

■ [باشارة من يد إهامى تبدأ مواكب المهنيين من العاملين بالقطاع وهم

يهتفون هتافات إيقاعية ..

■ بمعزه .. بخروف باللى تقول عليه ..

نفديك يا أحلى سيسى بيه !

■ السيسى معاه الحق ..

وعدوه يموت ويطلق !

■ [ويتجه السيسى إلى مكتبه محاطا بمظاهرة الحفاوة والتكريم] .



■ [في المحكمة ينطق القاضي بالحكم فاذا به ضد السيسى بيه
تماما . .

ينزل الحكم كالصاعقة على رؤوس مندوبى القطاع بقيادة وفائى ،
فيستنجد بالأستاذ مسعود القط محامى السيسى بيه الذى يثور
قائلا]:

المحامى : أول مرة فى حياتى أخسر قضية . . ده راجل نحس ووشه
عكر . .

■ [ثم يغادر المحكمة مسرعاً] .

■ [يتداول مندوبو القطاع فى كيفية توصيل الخبر للسيسى بيه . .
فيتصلون كلهم من هذه المهمة واحداً بعد الآخر ، إلى أن ترسى فى
النهاية على وفائى بصفته رجل السيسى بيه وكاتم أسراره] .

■ [فى مكتب السيسى بيه وفى قمة انتشائه وسعادته بالنصر الوهمى ،
يأمر بصرف منحة نصف شهر لجميع العاملين فى القطاع . . فيهلل
الحاضرون ويهتفون داعين له بطول العمر مع مزيد من المنح . . بينما
يصعق المدير المالى ويعترض قائلاً] :

المدير المالى : الباب الأول فى الميزانية عالحديدة يا سعادة البيه .

السيسى : خد من الباب الثانى .

المدير المالى : مخالفة مالية .

السيسى : اتصرف .

المدير المالى : مستحيل يا فندم .. دا حنا مطالبين بضغط المصروفات
الضخمة بتاعة الحفلات والمظاهر والدعاية دى لأن
الميزانية خرّمت قوى ..

السيسى : ما تخرم .. هو حد حاجاسبنا على مكسب ولا خسارة ..
إحنا قطاع خدمات زى التعليم والصحة ..

■ [فى هذه اللحظة يدخل وفائى عائداً من المحكمة ، وما أن يراه
السيسى حتى يقفز من خلف مكتبه مهللاً] :

السيسى : جيت فى وقتك .. قول لهم بقى على الحكم اللى صدر .
وفائى : [بصمت] .

السيسى : بشرهم بالانتصار العظيم اللى حققناه .
المجموعة : [تهتف] الله أكبر !

السيسى : إحكى لهم بالتفصيل ازاي ربنا نصرنا على الخصم ده .
وفائى : [يتلع ريقه بصعوبة] فى الحقيقة يعنى ..

السيسى : [يقاطعه] استنى .. إشرب الأول كوباية الشربات دى .
وفائى : مالوش لزوم لإن ..

السيسى : [يقدم له الكوب] .. إشرب يا راجل .. انت عارف إنى
أمرت بمنحه نص شهر لكل العاملين فى القطاع احتفالاً
بالحكم ده؟

وفائى : [بصعوبة شديدة] سيادتك استعجلت لأن ..

السيسى : [يقاطعه] وانت بالذات وش السعد .. فى نظير البشرى
الحلوه دى .. اعتبر نفسك اترقيت مدير عام ..

وفائى : [يفتح فمه فى بلاهة] هه !!

السيسى : موش ده اللي كان نفسك فيه من زمان ؟

وفائى : [يمدق مذهولا] سيادتك بتتكلم جد ؟

السيسى : أمال باهرز .. مبروك !

وفائى : الله يبارك فيك .

السيسى : هيه .. فيه حاجه معينة كنت عاوز تقولها لى ؟

وفائى : لا .. ما خلاص بقى ..

السيسى : طيب سمعنا بقى منطوق الحكم بالضبط .. قوله ..

وفائى : ربنا ينصرك دايا ..

السيسى : [يقاطعه مهللا] الله أكبر .. سامعين .. أول مرة فى حياتى

أسمع منطوق حكم بالعظمة دى .. القاضى حكم بأن
ربنا ينصرنى دايا .. منطوق جديد خالص .. !

■ [الهامى يقبل وفائى الذى أسقط فى يده بينما يقبل العاملون بعضهم

بعضا مهنتين .. أما السيسى فقد اتجه لتهنئة الفاتنات بنفسه واحدة

بعد الأخرى .. يرن جرس التليفون فيرد السيسى] :

السيسى : آلو ..

مسعود : أنا مسعود القط يا سيسى بيه .

السيسى : [مهللا] أهلا أهلا يا ميتر .. طبعا عاوز الحلاوة ؟

مسعود : خليها للنقض بقى إن شاء الله .. ما احنا لازم حانطعن ..

السيسى : واحنا نطعن ليه ؟ .. خلى الخصم هو الله يطعن .. إحنا
كسبنا القضية وخلص !

مسعود : ماحصلش .. ده هو اللي كسبها ..

السيسى : هاهاها .. انت بتهزر ؟!

مسعود : ماباهزرش .. إحنا خسرنا القضية يا سيسى بيه ..

السيسى : [مصعوقا] بتقول إيه ؟

مسعود : باقول لك القاضى حكم ضدنا .. موش الأستاذ وفائى
بلغك ..

السيسى : [يمتقع لونه وتسقط الساعه من يده] .

مسعود : آلو .. آلو .. آلو ..

■ [يجيم على الجميع صمت ثقيل ، ويحاول وفائى أن يتسلل للخارج

دون أن يلحظه أحد ، ولكن السيسى بيه يلمحه فيقفز نحوه كالنمر

وينشب فيه مخالبه وهو يصيح فى قمة غضبه] :

السيسى : ده انا حاشرب من دمك !

■ [يحول الآخرون بينه وبين وفائى قبل أن يفتك به] .

■ [فى هذه اللحظة يدخل موكب موظفى إحدى الادارات وقد جاءوا
للتهنئة متأخرين ويهتفون هتافا منغما] :

■ مبروك مبروك النصر . .

يا سيسى يا راجل العصر !

[السيسى يترك رقبة وفائى ويهجم عليهم ويضربهم فى غيظ باللكمات
والشلايت وهو يهدد قائلا] :

السيسى : خونة . . مجرمين . . كلاب . . [وتتابه حالة هستريا شديدة ،
فيظل يصيح ويضرب الهواء بيديه حتى يسقط مغشيا عليه . .
فيحملونه بسرعه إلى الإدارة الطبية] .

■ [وفائى بعد العلقة التى نالها من السيسى بيه يحاول أن يداوى جروحه
ويللم كرامته التى تبعثرت حين يحيط بعضهم به يتساءلون] :

الأول : ماحدث فى القطاع عارف هى كانت قضية إيه بالضبط .

ثان : يقولوا جناية تزوير . .

ثالث : موش بعيدة عليه . .

رابع : لا . . اختلاس . .



خامس : هو فعلا مختلس . .

سادس : يا اخوانا دى قضية نفقة . .

سابع : وأنهى ست فيهم بقى اللى رافعاها؟!

ثامن : هى غالبا قضية سب وقذف .

تاسع : وليها تكونش هتك عرض؟

عاشر : معروف عنه الاثنين .

الأول : ما تدلنا أنت يا أستاذ وفائى . . إنت موش اطلعت على أوراق

القضية وكنت متابعتها أولا بأول؟!

وفائى : [فى حسرة] أيوه .

الأول : طيب قول لنا بقى إيه هى تهمة بالضبط؟ تزوير ولا اختلاس

ولا نفقة ولا سب علنى ولا هتك عرض؟ .

وفائى : بصراحة . . هو متهم بجميع التهم اللى ذكرتها دى . . وتزيد

عليهم تهمة أول مرة أسمع عنها . .

الأول : اتهموه بإيه؟

وفائى : بأنه فسّل . . !



الفضيحة التاسعة

السياسي

بعزق العليقة .. (*)

(*) عن مسرحية « حصحص الحبوب » للاستاذ توفيق الحكيم



■ [مكتب رئيس القطاع السيسى بيه] :

السيسى : وابعت انذار لناظر مدرسة النجاح الباهر ده . .

المحامى : وإذا ماكانش عنده مقدرة يدفع الايجار المتأخر؟

السيسى : يا ريت . . عشان تاخذ اجراءاتك وتطرده . . ونضم الأرض بتاعته لنا .

المحامى : سعادتك من زمان منشن على مدرسة النجاح الباهر دى يا سيسى بيه . .

السيسى : أصل الأرض ملك القطاع والأرض دى امتداد طبيعى لنا واحنا محتاجينها بشدة . .

المحامى : بس التلامذة حايقوا فى الشارع .

السيسى : موش أحسن ما سيارات القطاع تبقى هى اللى فى الشارع!

المحامى : لاحظ انك كده حاتقفل مدرسة .

السيسى : لكن حافتح جاراج !..!

■ [مدرسة النجاح الباهر] :

■ [الناظر وقد قرأ الإنذار يصاب بغضة ويحدث السكرتير الذى يقف أمامه] :

الناظر : مافيش فايده .. رئيس القطاع ده زانقنا فى خانة اليك ..

السكرتير : السيسى ده راجل مفترى ..

الناظر : يا الدفع يا الطرد .. دبرنى يا حنفى ..

السكرتير : خزينة المدرسة مافيهاش ولا مليم .. بس حاتفرج .

الناظر : فيه كام تلميذ مستجد السنة دى ؟

السكرتير : ولا تلميذ .. كله دلوقتى بيروح مدارس لغات .. بس حاتفرج ..

■ [خبط عالباب] :

الناظر : ادخل ..

■ [يدخل برديسى وهو ريفى يبدو عليه الثراء] .

برديس : سلامو عليكم ..

سكرتير : عليكم السلام ورحمة الله .

الناظر : افندم !؟

برديس : بقى أنا مستبشر خير باسم مدرستكم دى . . النجاح الباهر . . وانا أصلى عندى ابن . .

■ [يقفز الناظر والسكرتير ويحتفیان به] .

الناظر : عندك ابن . . اتفضل أقعد .

السكرتير : الكرسي ده أريح .

الناظر : تشرب إيه يا . . ؟

برديس : محسوبك برديسى . .

الناظر : يا برديس بيه . .

برديس : بعدين . . بعدين . . بس عاوز أقول لكم أنه موش ابني
لزم . . أنا ماخلفتش خالص . . لكن با عزه زى ابني تمام
. . باراعيه فى الأكل والشرب واللبس وكافة شىء يحتاجه
. . موش فاضل غير العلام . . فقلت حابقى أنا وهو
ناقصين علام . . بدّيته عن نفسى وقررت أعلمه بالمرّة . .
مادام الحال ميسور . . وجبته معايا . .

الناظر : خير ما فعلت .

برديس : ومستعد لكل طلباتكم من جنيه لألف . .

■ [السكرتير والناظر يتبادلان النظرات] .

السكرتير : هو فين اسم النبي حارسه !؟

برديسى : رابطه بره .

السكرتير : رابطه !! آه . . لازم خايف ليجرى هنا ولا ينطّ هناك . .

الناظر : حاكم الاولاد فى السن ده أشقيا أوى .

برديسى : ده ولا مؤاخذه حمار . .

السكرتير : بكره يتعلم . .

برديسى : موش حايتهلم إلا بدّه . .

■ [يخرج من عبه كراباجاً مدندشا ويقدمه له] .

خد عشان تضربه بيه عند اللزوم لاجل ما يخش فى مخه

العلام . .

الناظر : لا هوانت دايبا بتضربه بالكرباج ؟

برديسى : لا . . لما ألاقه حايتهلم يتملعن بس . .

الناظر : يتملعن ازاي ؟

برديسى : يعنى مثلاً هو متعود لما يجوع يقوم ينهق .

الناظر : ينهق !؟

برديسى : أيوه .. فباحط قدامه العليقة عشان ياكل على مزاجه ..
لكن أول ما بسلامته يشبع ألاقيه ينفخ وينفر نفرة جامدة ..
كده هو [ينفر] برر . ر . ر . ر . يروح مبعزق العليقة ..
هوب أقوم مناولة بالكرباج ! ..

الناظر : ينفر إيه وعليقة إيه يا عم برديسى !؟

■ [السكرتير يغمز للناظر سرا]

السكرتير : أيوه أيوه يا حضرة الناظر .. كلهم لما يشبعوا بيعملوا كده .
برديسى : بس بيصعب على كل مرة وانا باضربه .. أقوم أطبب عليه
وأدوب له كيلو سكر في جردل الميه بتاعه ..

الناظر : لا هو يشرب في جردل ؟

برديسى : في سَطْل .

الناظر : انت بتقول ايه !؟

السكرتير : الله !! .. جرى إيه يا حضرة الناظر .. كل واحد يشرب
في الطشت اللي يريجه .

برديسى : اسم الله عليك .

الناظر : أنا نفسي أشوف التلميذ اللي بياكل عليقة ويشرب في جردل
ميه ده .

السكرتير : عشان نحطه في عينينا الاثنين طبعاً ..

برديسى : حاروح أجيبه .

■ [يخرج برديسى فيتبادل الناظر والسكرتير النظرات]

الناظر : يظهر انه متريش ونايم على طين .

سكرتير : موش قلت لك حاتفرج !!

■ [يسير برديسى فى ممر بالمدرسة حتى نهايته حيث ربط حيوان صغير

غريب الشكل والحجم يأكل فى مقطف العليقة فى رقبتة وينظر إليه

برديس فى حنان]

برديسى : بالهنا والشفافيا ابنى . .

■ [ثم يرفع عنه مقطف العليقة]

كفايه كده . . الباقى حاعملهولك سندوتش تاكله فى

الفسحة مع التلامذه .

■ [ثم يقوده فى اتجاه حجرة الناظر] .

■ [حجرة الناظر] :

السكرتير : ده وقع ولاحدش سمى عليه .

الناظر : قصدك إيه ؟

السكرتير : حاجهز له كشف بالمصروفات المطلوبة ما يخرش الميه . .

الناظر : (محذرا) حنفى . . إحنا مؤسسة تعليمية يعنى عندنا ضمير

وبننشر الأخلاق الحميده .

السكرتير : وهو أنا حاقبل على ولادى فلوس حرام .. كل مليم
حانحصله منه حايكون بالأصول ..

الناظر : آه .. إذا كان كده معلش .. مادام بالأصول يبقى عدانا
العيب .. نستغله نقطعه .. نهبره .. بس بالأصول ..

■ [يدخل برديسى وهو يجز الحيوان الصغير] .

برديسى : خش يا حيبى ..

■ [الناظر والسكرتير يتحدثان فى دهشة]

الناظر : إيه ده ؟!

السكرتير : فىن التلميذ ؟!

برديسى : ما هو ده .

■ [ثم يحدث الحيوان] :

ياللا سلم على البيه الناظر وحضرة السكرتير .. معلش ..
بكره ياخذ عليكم وتاخذوا عليه .

الناظر : [مصعوقا] حمار بحق وحقيق ؟!

برديسى : ما تقولش حمار .

السكرتير : حصان ..

برديسى : ولا حصان .

السكرتير : أمال إيه؟!!

برديسى : من ده على ده ..

الناظر : إزاي؟!!

برديسى : هو الحمار لا مؤاخذه لما يعشّر فرسة بيخلفوا إيه؟!!

الناظر : بغل ..

برديسى : إسم الله على مقامك .. لكن لما الحصان بقى يعشر حمارة

يقوموا يخلفوا اللي واقف قدامكم ده .. سيسى ..

الناظر والسكرتير : سيسى؟!!

برديسى : إيوه .

السكرتير : يعنى هو ده ابنك؟!!

برديسى : بالتبنى .. بس مربيه عالغالى .. ماليش غيره فى الدنيا ..

باخاف عليه من النسمة الطايرة ..

الناظر : دبرنى يا حضرة السكرتير ..

السكرتير : مافيهاش حاجه يا حضرة الناظر ..

الناظر : يعنى إيه .. نقبله؟!!

السكرتير : ده إذا كان عنده قدرة على دفع المصاريف ..

■ [وينظر بنصف عين تجاه برديسى]

برديسى : ما أنا قلت لكم حادف من جنية لألف . .

الناظر : حيث كده . . أنا ما اقدرش أرفض تلميذ جاى يطلب العلم . .
دي رسالة مقدسة . . وأنا باقبله مفتوح الذراعين . .

السكرتير : وهى دي الأصول . .

الناظر : أكتب إسمه يا حضرة السكرتير . . سيسى البرديسى . .

السكرتير : السن ؟

برديسى : أربع سنين .

الناظر : يبقى ندخله الحضانة .

السكرتير : يجوز برديسى يجب يدفع له بزيادة شويه فندخله سنة ثانية
على طول .

برديسى : أذفع . .

■ [يخرج المحفظة ويدفع مبلغا] .

الناظر : لو تدفع أكثر ندخله سنة رابعة . .

برديسى : أذفع .

■ [يدفع مبلغا ثانيا] .

الناظر : بس بالأصول . . وبدل ما توديه وتجيبه كل يوم وتعطل نفسك
عن مشاغلك ندخله الداخليه .

برديسى : موافق .

الناظر : حاتشوفه كل ثلاث أشهر مره . .

برديسى : موافق . .

السكرتير : بس حاتدفع المبيت والوجبات فطور وغدا وعشا . .

برديسى : أدفع . .

■ [يدفع]

الناظر : وكله بالأصول . . وبعدين تيجى بقى مصاريف التعليم
والمدرسين ومجموعات التقوية والاشراف والنظافة .

برديسى : أدفع . . [يدفع] .

السكرتير : ومصاريف الهوايات والأنشطة الرياضية والكشافة والرحلات
والموسيقى والتمثيل وحمم السباحة . .

برديسى : أنا شايف إن كله بالأصول . . عاوزين إيه كمان بالأصول !؟

الناظر : التلميذ لازم له مصروف إيد . . نفسه تهفه على ملانة ولا
قصب ولا جزر ولا طبق برسيم أو أى حاجه من الكانتين . .

برديسى : حادفع . . حادفع . . حادفع . . !

■ [يدفع مابقى فى المحفظة ويقلبها فارغة] .

■ [يتظاهر السكرتير بكتابة اسم الطالب فى كشوف الطلبة

وتسكينه في فصل معين . . الخ . . ويخرج برديسي راضيا سعيدا] .

■ [السكرتير والناظر ينفجران بالضحك] .

السكرتير : حد يصدق ده . . حمير يخشوا مدارس ويطلعوا تلامذة ؟

الناظر : أحسن من التلامذة دلوقتى اللي بيخشوا مدارس ويطلعوا حمير؟!!

السكرتير : موش قلت لحضرتك حاتفرج . . ؟

الناظر : الفلوس دى نوردها لحساب الزيت السيسى بيه كدفعة من الايجار المتأخر .

السكرتير : دى الدفعة الثانية ميعادها قرب . .

الناظر : يادى الحوسه . . دبرنى يا حنفى؟!!



■ مكتب رئيس القطاع :

السيسى : بس انت قلت لى انهم موش حايقدروا يسددوا!!!

المحامى : ما هو ده اللي باستغرب له . . جابوا الفلوس منين ؟ . . دلوقت خلاص مانقدرش نطردهم . .

السيسى : ميعاد القسط الثانى حل . . ما تديش مهلة بقى . . هات لى حكم مستعجل بطرد التلامذه والاستيلاء على المدرسة .

■ [يصل الانذار بالطرد إلى مدرسة النجاح الباهر فيقع الناظر
والسكرتير في حيص بيص] . .

■ [في نهاية اليوم الدراسي يلمح الناظر السكرتير حنفي في حوش
المدرسة وهو يجر السيبي الصغير سراً متسللاً به إلى باب الخروج
فيسرع إليه ويسأله] :

الناظر : الطالب ده مزوغ ولا إيه ؟!

السكرتير : السيبي بعث انذار تاني .

الناظر : وحانجيب له فلوس منين ؟

السكرتير : ما هو عشان كده فكرت أبيعه . .

الناظر : تبيع إيه ؟

السكرتير : السيبي الصغير ده . .

الناظر : انت اتجننت . . عاوز تبيع التلميذ ؟!

السكرتير : موش أحسن ما ننطرد من هنا والمدرسة تقفل والتلامذه
يصوعوا ؟!

الناظر : بس مين حايشتريه ؟

السكرتير : ده حايتباع زى الحلاوة . . البلد محتاجه حمير .

الناظر : هي ناقصة !!

السكرتير : البهيم حايضحى بنفسه فى سبيل تعليم الآخرين .

الناظر : مثال للعطاء والوفاء ..

[يربت على السيسى فى حنان] .

السكرتير : قلت إيه ؟!

الناظر : هل هى دى الأصول ؟

السكرتير : طبعا ..

الناظر : بيع .. !

■ [يتم بيع السيسى الصغير لعربخانة عربات كارو مجاورة للمدرسة] .

■ [تمر الشهور ويفاجأ الناظر ذات يوم ببرديسى يدخل عليه قائلًا] :

برديسى : إزيك يا سعادة الناظر ؟

الناظر : إنت مين يا جدع انت ؟!

برديسى : برديسى .. إنت نسيتهنى ؟

الناظر : آه .. إنت بتاع الحمار ؟

برديسى : قصدك السيسى .. أنا جيت حسب الميعاد اهو .. عاوز

اشوفه بقى ..

الناظر : آه .. بس هو مشغول دلوقتى فى درس خصوصى ..

مجموعه تقوية .

برديسى : تقوية . . ربنا يقويك يا بنى . .

الناظر : بياخذ فيزيا . .

برديسى : مانيزيا ؟ . . وليه الشربه دى ؟ معدته تعبانه ؟

الناظر : ماتضيعشى وقتى . . تعال له مره تانية .

برديسى : المهم إنى اطمنت إنه بخير .

■ [يخرج برديسى وتمر فترة أخرى ، ثم يعود للمدرسة فيقابل

السكرتير]:

برديسى : صباح الخير . . فين الواد ؟

السكرتير : لاجل حظك . . طلع النهاردة فى رحلة مع التلامذة للاقصر

وأسوان . .

■ [ينصرف برديسى محبطا ، ولكنه يعاود ثانيا بعد فترة ، ويقابل الناظر

ويسأله عن الجحش . . فيرد الناظر قائلا] :

الناظر : سيب السيسى خالص لانه مشغول جدا فى المذاكرة عشان

امتحان آخر السنة . .

برديسى : عقبال الشهاده يا سيسى وتروح مكتب التنسيق وتخش الطب

البيطرى عشان تعالج كل أهل الكفر .



■ مكتب القطاع :

■ [السيسى بيه ثائر جدا على المحامى الذى فشل فى استصدار حكم بطرد المدرسة من تلك الأرض ، وهو فى دهشة من أين يأتى ناظرها بالنقود لسداد الإيجارات المتأخرة ..] .

السيسى : انا باستغرب انتو اتعلمتوا إيه فى كلية الحقوق ؟ .. طيب إيه رأيك بقى إن أنا لقيت الحل .. أصل قضية الطرد حاتاخذ وقت ..

المحامى : أمال حاتعمل إيه!؟


السيسى : حاخلى الحى يصدر قرار إزالة للمدرسة لانها تصدعت بعد الزلزال ..

المحامى : يا عينى يا سيسى بيه .. بتقسّم والله ..

■ [يرسل الحى خطابا للمدرسة يفيد بضرورة معاينتها هندسيا بواسطة لجنة من الحى ، لتقرير إمكانية تنكيستها بعد الزلزال أو إصدار قرار إزالة لها نهائيا .. وما أن يقرأ السكرتير الخطاب على الناظر حتى يدرك الأخير أن السيسى بيه وراء كل هذا] .

الناظر : موش ممكن حانطّمن ونشوف شغلنا غير لما اللى اسمه السيسى ده ينكشع نهائيا من هنا ..

■ [فجأة يفتح الباب ويدخل برديسى] .



برديسى : شوفوا بقى . . انا موش منقول من هنا النهاردة غير لما أشوفه .

[الناظر والسكرتير ينظران لبعضهما فى حيرة] . . فىن ابنى ؟!

الناظر : [مرتبكا] ما هو أصل . .

برديسى : فىن سيسى ؟!

السكرتير : يووه . . ده نجح وانخرج . .

■ [يغمز للناظر]

السكرتير : واتوظف كمان .

برديسى : خبط لزق كده من أول سنه ؟!

السكرتير : أصله ما شاء الله نبيه اوى . . طالع لمين الحمار ده يا ترى ؟

برديسى : هاهاها . . كلهم فى البلد بيقولوا إن انا طالع للحمار . .

واستوظف فىن بقى ؟

السكرتير : رئيس قطاع . .

■ [الناظر يحدق مصعوقا]

برديسى : طبعا . . هو حد بيْفهم زيه . . البركه فىك يا حضرة

الناظر . . وفىن بقى القطاع اللى هو رئيسه ده ؟

السكرتير : المبنى اللى لازق فىنا ده . .

برديسى : حاروح له على طول .

السكرتير : بس ده بقى حاجة تانية دلوقتي .. حاتلاقيه اتغير خالص .. بقى بنى آدم ..

برديسى : أخلاقه اخلوت يعنى ؟

السكرتير : لا .. بنى آدم زى وزيك .. لابس بدلة وقاعد على مكتب .. موش بيقلوا إن التعليم بيخلي الواحد بنى آدم ؟

برديسى : صح .

السكرتير : أهو بقى بنى آدم ..

برديسى : يا حلاوة .. ويا ترى حايعرفنى لما يشوفنى ؟

السكرتير : طبعا .. بس جايز انت ما تعرفوش .

برديسى : مهما اتغير .. فبرضه فيه حاجتين ما بيخفوش على أبدا .. ريجته وديله .

السكرتير : صح .. اتكل على الله وروح له ياللا .. بس إيدك على حلاوة نجاحه بقى ..

الناظر : وبعدين وياك يا حنفى .

السكرتير : دى بالأصول ..

الناظر : يبقى هات .

■ [برديس يفرغ لها المحفظة مرة أخيرة ثم يسارع بالخروج] .



قاعة العرش بالقطاع :

■ [يجلس السيسى بيه بين إلهامى مدير العلاقات العامة عن يساره ، والناقد درويش عن يمينه ، ونائبه ونديمه وفائى بيه من خلفه ، وهم يكونون لجنة لاختيار وجوهاً جديدة لإدارة العلاقات الخاصة من بين ثلاثة آلاف فتاة تتراوح أعمارهن ما بين ١٨ ، ٢٤ سنة ، تقدمن للمسابقة التى أعلن عنها القطاع . . وقد امتلأت القاعة بمجموعة منهن فى حراسة كتيبة السكرتيرات الفاتنات . . وكل متسابقة ينحصر أملها فى نظرة رضاء من السيسى بيه وتعطر القاعة رائحة البارفانات الباريسية . . مغلفة بضحكات الجنس الناعم] . .

■ [متسابقة جميلة لعوب تكشف عن بعض مواهبها فيسيل لعاب السيسى بيه ويسقط فوق استهارة التقييم . فى هذه اللحظة يدخل ساعى مهرولاً إلى السيسى بيه] :

الساعى : واحد بره مصمم يدخل يقابل سيادتك . .

السيسى : موش وقته .

■ [برديسى يدخل مندفعاً متلفتاً] .

برديسى : فىن السيسى ؟

السيسى : أنا . . فيه حاجه يا أخينا ؟

برديسى : بالحضن . . !

■ [برديسى يحتضن السيسى بقوة] .



■ [مهمة وضجيج في القاعة] .

■ [برديسى يشمشم في السيسى]

هى ريحتك مضبوط . . واحشنى أوى . .

السيسى : إنت تبقى مين ؟!

برديسى : انت نسيتنى يا سيسى ؟

السيسى : هو احنا اتقابلنا قبل كده ؟

برديسى : إخص الله يقل قيمتك .

السيسى : إحفظ أدبك ؟

برديسى : نسيت اللى رباك وصرف عليك دم قلبه لحدّ ما بقيت بنى

أدم؟!!

السيسى : إنت بتقول إيه يا رجل انت ؟

برديسى : يخونك العلف اللى كنت بانقيهولك ، والتبن اللى كنت

بانخلهولك والبرسيم اللى كنت باغسلهولك . .

السيسى : لمّ لسانك طاوعنى .

برديسى : دانا كنت بافرش لك منامة جنبى من قش الرز النضيف

عشان ما تنامش مع بقية البهايم فى الزريبة . .

السيسى : هى حصلت ؟

برديسى : إيه . . كبرت عالزربية ؟ . . دانت كانت يقف عليك الدبان
والناموس والقراد وتنش بديلك ولا فائدة لحدّ ما أجى أنا
انشهولك . .

السيسى : ديل إيه يا صفيق يا بجح !؟

برديسى : ونسيت كمان إن لك ديل ؟ . . هو فين ؟ . . أشوفه . . ؟

■ [برديسى ينظر خلف السيسى باحثاً عن الذيل ، ويلف ويدور
حوله].

■ [يضحك الحاضرون فى أكمامهم].

السيسى : إنت أكيد مجنون . .

برديسى : أنا كنت مجنون لما اشتريتك انت وأبوك من سوق الجمعة . .

■ [السيسى ينفخ بشدة]

السيسى : اف ف ف ف . . .

برديسى : حاتنفخ برضه وتبعزق العليقة . . أه ما انت شبعت بقى ودى
عادتك لما تشبع . .

■ [برديسى يخرج من جيبه الداخلى الكرباج المندش ويضربه به . .

فيجرى السيسى فى الحجره وخلفه برديسى بطارده . . يهرول
الحاضرون خائفين ، ويطاردهم برديسى حتى يخرجوا . . ولا يبقى
سوى سيسى وبرديسى].

[هرج ومرج] .

السيسى : الحقونى يى يى

■ [برديسى ينفرد بالسيسى ويطارده والكرباج فى يده]

برديسى : هو اللى فيه داء ما يبطلوش والله لاكون ملبسك البردعة
ومرجعك تجر عربية السباخ . . !



■ [كان ناظر المدرسة قد أدرك ما يمكن أن يحدث من برديسى عندما
يدخل على السيسى بيه فى القطاع نتيجة اللبس الذى كان ضحيته
. . فيقرر تفادياً لتطورات خطيرة يمكن وقوعها أن يعيد الأمور
لنصابها . . فيسرع إلى القطاع بعد أن يرسل سكرتيره إلى عربخانة
الكارو بحثاً عن الجحش الصغير ، وحمله مسئولية جميع المشاكل
والأزمات] .

■ [يدخل ناظر المدرسة إلى القاعة فى اللحظة التى انفرد فيها برديسى
بالسيسى ونزل فيه لسوعة بالكرباج . . بينما السيسى وقع على الأرض
وأخذ يهلت ويستعطفه لكى يعتقه لوجه الله] . .

الناظر : [صائحا] برديسى . .

برديسى : [يلتفت فإراه] إنت جيت يا حضرة الناظر ؟ هو ده برضه العلام
اللى علّمتهوله ؟ ده حتى موش عارف إنه حمار . .

الناظر : وهو فيه حمار بيعرف إنه حمار ؟ .

السيسى : [فى ضعف] إنت .. مين ؟!

الناظر : أنا ناظر مدرسة النجاح اللى حضرتك عاوز تهدها ..

برديسى : وكمان عاوز يهد المدرسة اللى علمته .. طيب تعالى بقى ..

■ [يهجم على السيسى ثانيا]

الناظر : كفايه يا برديسى ..

■ [يدخل رجال أمن القطاع الذين تم استدعاؤهم على عجل ،

ويمسكون برديسى ويشلون حركته] .

السيسى : (يستأسد فجأة) والله لاوديك فى داهية .. البوليس ..

النيابة .

الناظر : مالوش لزوم يا سيسى بيه .. أصل برديسى كان فاكرك واحد

تانى ..

■ [يدخل السكرتير فى هذه اللحظة وهو يجير الجحش السيسى

الصغير] .

السكرتير : استلم يا برديسى .. ابنك رجع لك أهو

■ [برديسى يفغر فاه ويحدق فى ذهول ، ثم ينقل النظر بين الجحش

والسيسى بيه أكثر من مرة وهو غير مصدق لما يرى .. ثم يشير إلى

السيسى بيه قائلا] :

برديسى : لما ده الجحش بتاعى ؟! .. أمال ده [يشير للجحش] يبقى

مين ؟!

الفهرس

٩	مقدمة
١١	الفضيحة الأولى : مدير بين العصافير
٢٥	الفضيحة الثانية : المسنود
٤٣	الفضيحة الثالثة : كيف تغلب على العجز
٥٥	الفضيحة الرابعة : السيسى بيه وفتاة النينجا
٦٩	الفضيحة الخامسة : ابن الكُبة طلع القبة
٨١	الفضيحة السادسة : السيسى بيه مسك سبحة
٩٥	الفضيحة السابعة : الراقصة والسيسى
١٠٧	الفضيحة الثامنة : السيسى بيه كسب القضية
١١٩	الفضيحة التاسعة : السيسى بعزق العليقة

عربية للطباعة والنشر
١٠٠٧ شارع السلام - أرض اللواء المهندسين
تليفون : ٣٠٣١٠٤٣ - ٣٠٣٦٠٩٨

منتدی سور الأزبکیه

WWW.BOOKS4ALL.NET

فضائح السياسي بيته



المؤلف في سطور

بأسلوب فكاهي غارق في السخرية، يأخذنا الكاتب الساخر الشهير الأستاذ يوسف عوف في زيارة خيالية لأحد مواقع القطاع العام التي استشرى فيها الفساد .. ولم يترك المؤلف فضيحة مما نشرتها الصحف أو مما تضمنته ملفات التحقيق في بعض المواقع إلا وسلط عليها الضوء الباهر .. وفي هذا الضوء رأينا صوراً كاريكاتيرية تبين لنا بعضاً مما يقوم به بعض رؤساء هذا القطاع من انحرافات وسوء ادارة واستغلال للنفوذ ..

وبقدرة الاستاذ يوسف عوف على الإضحاك والسخرية، جعلنا نضحك ونسخر معه عما فعله هذا الرمز المنحرف الذي أطلق عليه اسم «السياسي بيه» .

■ يوسف عوف إسم معروف في عالم الكتابة الساخرة وعلم من أعلام الكوميديا منذ برنامج ساعة لقلبك في الخمسينات وحتى الآن ..
■ تؤكد أعماله أننا أمام مؤلف درامي بارع ذى خيال شديد الخصوبة، يقدم لنا الكوميديا الراقية التي تعتمد على المواقف الفكاهية والمفارقات والمفاجآت المثيرة ، مع إيقاع سريع وحوار تلغرافي لاذع ..
لذلك تثير أعماله دائماً عواصف من الضحك في جميع المجالات التي يطرقها (المسرح - الإذاعة - السينما - التلفزيون - الصحافة - الكتب) ولكنه ضحك مبلبل بالدموع ..
وهذا هو الكتاب الثالث الذي يسعد الدار المصرية اللبنانية أن تقدمه له .

الناشر



طباعة • نشر • توزيع
برفأ دار شادو - صرب ٢٠٢٢ - القاهرة

AL-DAR AL-MASRIAH AL-LUBNANIAH

16 ABD EL KHAIFER SARWAT St. P.O.Box 2022 Cairo-Egypt PHONE: 3936743-3923525 FAX: 3909618 CABLE DARSHADO

الدار المصرية اللبنانية

PRINTING — PUBLI SHING — DISTRIBUTION